

# Turkiston

1925-yildan chiqqan boshlagan

«Kamolot» yoshlar ijtimoiy harakati Markaziy Kengashining nashri

www.turkiston.uz

2013-yil 27-aprel, shanba № 31 (15669)

## ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ АНДИЖОН ВИЛОЯТИ КЕНГАШИНING НАВБАТДАН ТАШҚАРИ СЕССИЯСИДАГИ НУТҚИ

Ассалому алайкум, ҳурматли депутатлар! Қадрли дўстлар!

Авваламбор, сиз, азизлар билан, Андижон аҳли вакиллари, депутатлар ва фаоллари билан кўришиб, барчангизни соғ ва бардам кўриб турганимдан ва шу фурсатдан фойдаланиб, сизларга, сизлар орқали бутун вилоят халқига ўзимнинг чуқур ҳурмат ва эҳтиромимни изҳор этишдан бахтиёрман.

Мажлисимизнинг кун тартибига ўтишдан олдин, аввало, сиз, Андижон элининг ҳол-аҳволини сўраб, тинч-омон юрганингиздан хабардор бўлиб, барчангизга куч-қувват ва янги омадлар тилаш менга ҳақиқатан ҳам катта ҳурсандчилик етказди.

Ҳаётимиз қандай шиддат билан ўзгараётганини ҳисобга оладиган бўлсак, сиз ҳурматли юртдошларим билан қанча тез учрашиб туриш, ён-атрофимиздаги аҳвол, пайдо бўлаётган турли муаммолар ҳақида фикр алмашиш, уларнинг ечимини топиш зарурати ва эҳтиёжи кўпайиши табиийдир.

Бугунги учрашувимизга ҳам шу кўз билан қараб, Андижон аҳолисининг ўтган давр мобайнида қўлга киритган ютуқларини сарҳисоб қилиш билан бирга, сиз-

ларнинг эртанги кунни қандай кўраётганингиз, режа ва мақсадларингиз билан яқиндан танишиб, бир ёқадан бош чиқариб, ҳаракатларимизни бирлаштириб иш тутсак, айти муддао бўлур эди.

Ҳеч шубҳасиз, мамлакатимиз қўлга киритаётган, жаҳон ҳамжамияти тан олаётган ютуқ ва марраларга эришиш йўлида бутун Ўзбекистонимиз қатори Андижон вилояти меҳнаткашлари ҳам муносиб ҳисса қўшаётгани, кўп соҳаларда етакчи ўринларни эгаллаб келаётганини эътироф этиш, вилоят маркази, барча шаҳар ва қишлоқлар қиёфаси тубдан ўзгариб, тобора обод бўлиб, халқнинг ҳаёт сифати ва даражаси юксалиб бораётгани албатта барчамизни қувонтиради ва мамнуният етказди.

Ҳақиқатан ҳам, Андижон вилоятида кейинги йиллар давомида амалга оширилган ишларга ҳолисона баҳо берар эканмиз, бошқаларга намуна қилиб кўрсатишга арзийдиган ютуқ ва натижалар ҳақида кўп гапириш мумкин.

Кейинги етти йил мобайнида вилоятнинг ялли худудий маҳсулоати 2 баробар, саноат 2,9 баробар, қишлоқ хўжалиги 1,6 баробар, пуллик хизматлар 2,7 баробар, қурилиш иш-

лари 3,4 баробар ошганини қайд этиш зарур.

Бу рақамларни гапириш албатта осон. Лекин уларнинг ортида қандай машаққатли меҳнат ётганини, ўйламанки, ҳаммамиз яхши тушунамиз. Ҳаётга ҳолисона кўз билан қарайдиган одам бу рақамларни эшитиб, ҳайратга тушиши табиий.

Эътиборли томони шундаки, бундай ижобий ўзгаришларни бугунги кунда бутун Андижон вилоятида, қишлоқларда ҳам, шаҳарларда ҳам кўриш, кузатиш мумкин. Сизларнинг бундай ютуқлардан ғурурланиб, лекин уларга маҳлиё бўлмасдан, яна янги марраларни эгаллаيمиз, доимо олдинга интиламиз, деган кайфият билан яшаётганингизни барчамиз яхши биламиз ва юксак қадрлаймиз.

**Шу борада бир фикрни алоҳида таъкидлаб айтмоқчиман: кимки бугунги кунда Ўзбекистонда амалга ошириляётган улкан ўзгаришларни кўрмоқчи, улардан тўлиқ хабардор бўлмоқчи бўлса, биринчи галда Андижонга келсин, ўзини андижонлик деб атайдиган одамларнинг меҳнати, ҳаёти, бугунги ютуқлари билан яқиндан танишсин.**

(Давоми 2-бетда)

Ўзбекистон Республикаси Президентининг ФАРМОНИ

## Ш.Қ.Абдурахмоновни Андижон вилояти ҳокими лавозимига тайинлаш тўғрисида

Ўзбекистон Республикаси Конституциясининг 93-моддаси 15-банди ва 102-моддаси ҳамда халқ депутатлари Андижон вилоят Кенгашининг

қарорига мувофиқ:

**Шухратбек Кушақбоевич Абдурахмонов** Андижон вилояти ҳокими лавозимига тайинлансин.

Ўзбекистон Республикаси Президенти

И.КАРИМОВ

Тошкент шаҳри,  
2013 йил 26 апрель



Сардор Муллажонов фотокўллажи

Ўзбекистон Республикаси Президентининг ФАРМОНИ

## ИККИНЧИ ЖАҲОН УРУШИ ҚАТНАШЧИЛАРИНИ РАҒБАТЛАНТИРИШ ТЎҒРИСИДА

9 май умумхалқ байрами — Хотира ва қадрлаш куни ўтказилиши, шунингдек, 1941-1945 йиллардаги Иккинчи жаҳон урушида фашизм устидан қозонилган Ғалабанинг 68 йиллиги нишонланиши муносабати билан ҳамда уруш қатнашчилари ва ногиронларини моддий рағбатлантириш мақсадида:

1. Иккинчи жаҳон уруши қатнашчилари ва ногиронларига 500 000 (беш юз минг) сўм миқдорда бир марталик пул мукофоти белгилансин.

2. Мазкур Фармонни бажариш билан боғлиқ сарф-харажатлар республика бюджетидан маблағлари ҳисобидан амалга оширилсин.

3. Ўзбекистон Республикаси Мудофаа вазирлиги, Ички ишлар вазирлиги, Миллий хавфсизлик хизмати, Меҳнат ва аҳолини ижтимоий муҳофаза қилиш вазирлиги Молия вазирлиги ва Марказий банк билан биргаликда Ик-

кинчи жаҳон уруши қатнашчилари ва ногиронларига ушбу пул мукофотининг тантанали ва байрамона вазиятда топширилишини таъминласин.

4. Қорақалпоғистон Республикаси Вазирлар Кенгаши, вилоятлар ва Тошкент шаҳар ҳокимликлари Ўзбекистон Республикаси Маданият ва спорт ишлари вазирлиги, Мудофаа вазирлиги, Ички ишлар вазирлиги, Бадий академия, Хотин-қизлар қўмитаси, Республика Маънавият тарғибот маркази, «Нуроний» ва «Маҳалла» жамғармалари, бошқа жамоат ташкилотлари билан биргаликда Ватанимиз озодлиги ва шаъну шарафи химоячиларига бағишланган махсус учрашувлар ва маърифий-бадий кечалар ўтказсин.

5. Ушбу Фармоннинг ижросини назорат қилиш Ўзбекистон Республикасининг Бош вазири Ш.М.Мирзиёев зиммасига юклансин.

Ўзбекистон Республикаси Президенти

И.КАРИМОВ

Тошкент шаҳри,  
2013 йил 25 апрель



# ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ АНДИЖОН ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми, боши 1-бетда)

Маълумки, илгариги замонда «Биз кўрмаганимиз болаларимиз кўрсин», деган ниёт ва қараш, керак бўлса, армон билан ота-боболаримиз дунёдан яшаб ўтди. Бугун эса замоннинг талаби бошқача. Яъни, фарзандларимиз биздан кўра кучли, билимли, доно ва албатта бахтли бўлиши шарт, деган широр ҳаётимиздан чуқур жой олмақда. Шу билан бирга, бугунги яшаётган одамлар, халқимиз ҳаётдан рози бўлиб, ҳеч кимдан кам бўлмасдан, эркин ва фаровон яшаши керак.

Бугун одамларимизнинг юриш-туриши, муомала ва кийиниш маданияти, айниқса аёлларимизнинг ўзига, ҳаётга қараши, умуман, халқимизнинг турмуш даражаси кескин ўзгариб бораётганига барчамиз гувоҳ бўлмоқдамиз. Бу, ҳеч шубҳасиз, ижтимоий-иқтисодий ҳаётимиздаги ўзгаришларнинг энг муҳим натижасидир.

Андижон вилоятининг ишлаб чиқариш соҳасида янги тармоқлар пайдо бўлиши билан бир қаторда, саноат соҳасини модернизация ва диверсификация қилиш, технологик янгилаш, мавжуд маҳаллий хомашёдан самарали фойдаланиш борасида кенг қўлмалли ишлар амалга оширилганини таъкидлаш лозим.

Айниқса, халқаро бозорда рақобатдош, қўшимча қийматга эга бўлган маҳсулотлар ишлаб чиқарадиган замонавий корхоналар барпо этиш масаласига жиддий эътибор қаратаётганимиз ўзининг ҳосили ва натижаларини бермоқда.

Бу борада иқтисодийимизнинг локомотиви бўлган, ижтимоий ҳаётнинг маъно-мазмунини кескин ўзгартиришга хизмат қилаётган корхоналар, биринчи навбатда Асака шаҳридаги автомобиль заводи фаолияти ҳақида ҳар қанча гапирсак арзийди, албатта.

Бу корхонанинг мамлакатимиз учун бутунлай янги бўлган замонавий автомобилсозлик тармоғининг шаклланишига пойдевор қўйгани, юксак технологияларни, илгор илм-фан ютуқларини ўзлаштиришда қандай катта роль ўйнаётганини барчамиз яхши биламиз.

Хусусан, 2008 йилдан бошлаб, жаҳон автомобиль саноатида етакчи ҳисобланган «Женерал Моторс» компанияси билан ҳамкорликда ушбу заводда машҳур «Шевроле» бренди билан автомобиллар ишлаб чиқариш йўлга қўйилгани саноатимиз ривожига янги тарихий босқич бўлди, десак, муболаға бўлмайди.

Айни шу асосда ишлаб чиқарилаётган автомобилларнинг тури, технологик хусусиятлари тубдан яхшиланиб, мутлақо янги платформалар негизда «Ласетти», «Спарк», «Кобальт» каби 8 хилдаги замонавий автомобиль ишлаб чиқарилаётгани бу фикрни исботлаб турибди.

Маълумки, бугунги кунда кооперация асосида автомобилларга бутловчи ва эҳтиёт қисмлар етказиб берадиган машинасозлик корхоналари

тармоғи юртимизда кенгайиб бормоқда. Биргина Андижон вилоятининг ўзида бундай корхоналар сони сўнгги етти йилда 47 тадан 108 тага, улар томонидан тайёрланган маҳсулот ҳажми эса 1 триллион 100 миллиард сўмга етди. Бу эса мазкур тармоқда меҳнат қилаётган ишчи-хизматчилар сонини 22 минг 400 кишига етказиш имконини берди.

Мазкур тармоқнинг мамлакатимиз иқтисодиётидаги ўрни ва аҳамиятини инобатга олиб, соҳани юксак малакали кадрлар билан таъминлаш мақсадида Асака туманида ихтисослаштирилган касб-ҳунар коллежини, Андижон муҳандислик-иқтисодиёт институти негизда Андижон машинасозлик институти, Тошкент шаҳрида эса Турин политехника университетини ташкил этганимиз, ҳеч шубҳасиз, Ўзбекистонни замонавий автомобилсозлик марказига айлантириш йўлида салмоқли қадамлар бўлди.

1996 йили бу ноёб ва улкан корхонани қуришга киришганимизда юксак технологияларга асосланган бундай заводни ўзимизнинг одамлар бошқаришига ким ишонарди? Уша пайтда четдан туриб, Ўзбекистон энди автомобилсиз қолади, ўзбеклар фақат шофёр бўлиб ишлашга ярайди, деган турли-туман тўхмат гаплар ҳам бўлган эди. Бугун Асакадаги заводнинг энг замонавий автомобиллар ишлаб чиқараётганини кўриб, ўша одамларга, қалайсиз энди, десангиз, улар жим, лом-мим деб овоз чиқаролмайди.

Ана шу заводни бугунги кунда ким бошқармоқда, ким уни бутун дунёга машҳур қилмоқда? Ўзимизнинг истеъдодли болаларимиз, Жанубий Кореяда, бошқа мамлакатларда ўқиб, билим ва малакасини оширган ўз ёшларимиз. Бу инсонларнинг барчасига ана шундай фидоий меҳнати учун шу юксак минбардан туриб, чин қалбимдан миннатдорлик билдиришни ўз бурчим деб биламан.

Вилоят иқтисодиётида алоҳида ўрин тутадиган энгил саноат тармоғида ҳам кенг қўлмалли ўзгаришлар амалга оширилмоқда. Бу ҳақда кўп гапирмасдан, фақат айрим рақамларга эътиборингизни қаратмоқчиман.

Агар 2006 йилда вилоятда етиштирилган пахта толасини қайта ишлаш ҳажми 31,5 фоизни ташкил этган бўлса, 2012 йилда бу рақам 40 фоизга етди. Шу ўтган даврда қиймати 66 миллион долларлик 19 та йирик лойиҳа амалга оширилиб, 45 минг тоннадан ортиқ ип-калава, қарийб 9 минг тонна трикотаж полотно, 9 миллион донадан зиёд тайёр тикув-трикотаж буюмлари ишлаб чиқариш бўйича қўшимча қувватлар, энг муҳими, 3,5 мингта янги иш ўрни яратилди.

2006-2012 йилларда Андижонда пойафзал ишлаб чиқариш 8,6 баробар, чарм-галантерея буюмлари 11 баробар, мебель маҳсулотлари ишлаб чиқариш 13 баробар ўсгани ҳам вилоят иқтисодиётида амалга оширилаётган туб ис-

лоҳотлар самарасидир.

Вилоятда ўтган етти йилда 224,5 миллион долларга яқин чет эл инвестицияси, жумладан, 174 миллион 200 минг долларлик тўғридан-тўғри хорижий инвестиция ўзлаштирилди.

Ҳозирги вақтда бу ерда чет эл инвестицияси иштирокидаги 86 та корхона фаолият кўрсатмоқда. Ялпи саноат маҳсулотининг қарийб 70 фоизи, жами экспорт ҳажмининг эса салкам 89 фоизи ана шу корхоналар ҳиссасига тўғри келмоқда. Вилоятда экспорт таркиби ҳам кескин ўзгариб, қайта ишланган ва тайёр маҳсулотлар улуши 87 фоиздан 95 фоизга ортгани айниқса муҳим аҳамиятга эга.

Албатта, янги ютуқлар, қўлга киритилган марралар билан бирга, йўл қўйилган камчиликлар, ишга солинмаган кўпгина имкониятлар, барчамизни ҳали-бери ташвишга солаётган муаммолар борлигини ҳеч ким инкор этолмайди.

Шу нуқтаи назардан қараганда, вилоят саноатини ривожлантиришда бир қатор муаммолар, номуносивлик ҳолатлари кўзга ташланаётганини очиқ айтиш керак. Масалан, ишлаб чиқарилаётган саноат маҳсулотларининг 92 фоизи Андижон, Хонобод шаҳарлари, Асака, Андижон, Шаҳрихон туманларининг ҳиссасига тўғри келмоқда. Қолган 11 та туманда эса бу кўрсаткич, афсуски, паст даражада қолмоқда.

Энгил саноат тармоғидаги фойдаланилмаётган имкониятлар ҳақида гапирганда, вилоятдаги йигирув фабрикаларининг 63 фоиз қувват билан ишлаётгани албатта ҳеч кимни қониктирмайди.

Андижон вилоятининг 2013-2015 йилларга мўлжалланган ижтимоий-иқтисодий ривожлантириш дастурида белгиланган лойиҳаларни ўз вақтида бажариш масаласи алоҳида эътиборни талаб қилади.

Катта ҳажмдаги лойиҳаларни амалга ошириш учун, албатта, вилоятдаги мавжуд салоҳият билан бирга, ҳукуватимиз, тегишли вазирилик ва идораларнинг куч-имкониятларини сафарбар этишимиз даркор.

Жумладан, «Ўзқурилишматериаллари» компанияси вилоят ва туман ҳокимликлари билан биргаликда қурилиш маҳсулотлари ишлаб чиқариш бўйича қиймати 25 миллион долларлик 174 та лойиҳани амалга ошириши лозим.

«Ўзфармсаноат» компанияси маҳаллий тадбиркорлар иштирокида яқин икки йилда умумий қиймати 10 миллион доллар бўлган 5 та лойиҳани амалга ошириши зарур.

«Ўзэлтехсаноат» уюшмаси эса вилоятда маиший техника маҳсулотларини ишлаб чиқаришга қаратилган, умумий қиймати 10 миллион долларга яқин 5 та лойиҳани амалга ошириши таъминлаши керак.

Шунингдек, «Ўзбекэнерго», «Ўзтрансгаз» компаниялари ҳамда тегишли тижорат банклари ишлаб чиқарувчилар ва истеъмолчиларни узлуксиз энергия манбалари ва молиявий ресурслар билан кафолат-

ланган тарзда таъминлаш бўйича зарур чоралар кўриши даркор.

Ҳар қайси корхона, ҳар қайси ҳудуд, қолаверса, вилоят ёки бутун мамлакатимиз миқёсида бўладими, ишлаб чиқариш соҳаларини ривожлантириш, замонавий технологияларни жорий этиш, шиддат билан ўсиб бораётган рақобатга бардош бериш ва даромад олиш учун сармоя ва яна бир бор сармоя, яъни инвестиция керак.

Доимо изланишда бўлиб, эртанги кунимизни ўйлаб, ишчиларимизга муносиб маош тўлаш, уларнинг ҳаётини фаровон қилиш учун қўшма корхоналар тузиш, кичик бизнес ва тадбиркорликка кенг йўл очиб бериш, бу борадаги сунъий тўсиқ ва ғовларни олиб ташлаш энг муҳим масала, десам, ўйлайманки, бу ҳақиқат бугун ҳеч кимга сир эмас.

Чунки айни шу омиллар ҳисобидан Андижон вилоятининг энг ўткир муаммоларини ечиш мумкин, одамларимизни рози қилишимиз мумкин.

Агарки Андижон воҳасида суғориладиган, ҳайдаладиган ер танқислиги, аҳолининг эса жуда зич яшаши энг мураккаб муаммолардан бири эканини инобатга оладиган бўлсак, айнан шундай йўл яқкаю ягона тўғри, ўзини оқлаган йўл эканини ҳаётнинг ўзи тасдиқлаб бермоқда. Лекин, минг афсуски, айрим туманлар, хусусан, Пахтаобод, Улуғнор туманлари ана шундай йўлни жорий этишда, яъни четдан сармоя олиб келишда ўзини кўрсата олмапти.

Ҳурматли дўстлар!

Андижон заминиди шаклланган қадимий деҳқончилик мактабининг шўхрати нафақат юртимизда, балки бошқа ўлкаларда ҳам яхши маълум. Тобора ривожланиб, бугунги кунда қишлоқда ҳал қилувчи кучга айланиб бораётган фермерлик ҳаракати айнан Андижон заминиди тобланиб, янги тажриба ва куч топаётгани ҳеч кимга сир эмас.

Ўз ишининг чинакам фидоийси ва устаси бўлган андижонлик деҳқон ва фермерлар ўтган йили биринчилар қатори шартнома мажбуриятларини бажариб, 293 минг тонна пахта, 508 минг тонна бошоқли дон етиштириб бергани ҳар қандай тасанноларга арзийди.

Вилоятда кейинги олти йилда сабзавот етиштириш ҳажми 1,9 баробар, картошка — 2,2 баробар, полиз маҳсулотлари — 3,5 баробар, мева — 1,8 баробар, узум — 2,2 баробар ортиб, уларни қайта ишлаш ҳажми ўсаётгани айнан фермерларимиз ва деҳқонларимизнинг ишга ёндашуви ўзгариб, ўз ери, ўз мулкига эгалик ҳиссиёти кучайиб бораётганининг натижасидир.

Чорвачиликни оладиган бўлсак, сўнгги олти йилда қорамоллар сони 1,6 баробар, парранда 2,2 баробар, гўшт ва сут етиштириш 1,5 баробар, тухум етиштириш 1,8 баробар кўпайганини кўриш мумкин.

Буларнинг барчаси нафақат вилоят, балки мамлакатимиз аҳолисининг озик-овқат маҳсу-

лотларига бўлган эҳтиёжини қондириш билан бирга, бозорларимиздаги серобчилик ва арзончиликни таъминлашда муҳим роль ўйнамоқда.

Бугун мен, мана шу юксак минбардан туриб, вилоятнинг миришкор деҳқон ва фермерларига ана шундай фидокорона меҳнатлари учун чуқур миннатдорлик билдиришни ўзимнинг бурчим, деб биламан.

Табиийки, бундай ютуқлар туфайли фермерларнинг даромадига даромад қўшилмоқда, энг асосийси, уларнинг ўрта синф — мулкдорлар синфи сифатида мавқеи ошиб, қишлоқда ҳақиқатан ҳам ҳал қилувчи кучга айланмоқда.

Бу ютуқлар биринчи навбатда юртдошларимизнинг онгу тафаккури, дунёқараши тубдан ўзгариб бораётганидан далолат беради. Бу одамлар энди 1990 йилдаги кишилар эмас. Мен юртимизда ҳам, чет элларда ҳам бир фикрни кўп айтаман: биз эришган ютуқларни, эртанги кунимизнинг қандай ёруғ бўлишини билмоқчи бўлсангиз, аввало лицей ва коллежларимизга бориб, ёшларимиз билан учрашинг, уларнинг ёниб турган кўзларига қаранг, шунда сиз кўп нарсани тушуниб етасиз, дейман ва бу сўзларда чиндан ҳам катта ҳақиқат бор.

Ўйлайманки, ҳаммамиз яхши тушунамиз, ерни асраб-авайлаш, у билан тиллашиб яшаш керак. «Сен ерни боқсанг — ер сени боқадиди» деган чуқур маъноли ибора, менинг назаримда, айнан ўзбек заминиди пайдо бўлгандек туюлади.

Табиийки, қишлоқ ҳўжалигида юксак марраларни қўлга киритишда авваламбор юқори ҳосилдорликка эришишнинг гарови — ерларнинг мелиоратив ҳолатини яхшилаш бўйича амалга оширилаётган кенг қўлмалли ишларимиз пойдевор бўлиб хизмат қилмоқда.

Бу ҳақда сўз юритганда, 2008-2012 йилларда вилоятда 6000 километрга яқин очиқ коллектор-дренаж тармоқлари, 225 километрлик ёпиқ горизонтал дренаж тармоқлари, Улуғнор мелиоратив насос станцияси, 180 та мелиорация иншооти, 365 та дренаж қудуқ ҳамда бошқа объектларда қурилиш ва реконструкция ишлари амалга оширилганини айтиш лозим.

Шу даврда вилоят бўйича салкам 55 миллиард сўм маблағ сарфланиб, 120 минг гектар суғориладиган ернинг мелиоратив ҳолати яхшиланиши натижасида ғалла ҳосилдорлиги ўртача 6-8 центнерга, пахта ҳосилдорлиги 4-5 центнерга ошгани бу борадаги ишларимизнинг энг муҳим самараси, десам, ўйлайманки, сизлар ҳам бу фикрга қўшилсангиз.

Вилоятда қишлоқ ҳўжалиги техникаси паркни янгилаш масаласига ҳам алоҳида эътибор берилмоқда. Шу мақсадда охириги етти йилда қарийб 53 миллиард сўмлик 2 минг 300 дан ортиқ замонавий техника воситалари сотиб олингани ҳам буни тасдиқлайди.

(Давоми 3-бетда)

# ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ АНДИЖОН ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми,  
боши 1-, 2-бетларда)

Шу билан бирга, бу йўналишда ҳали кўп иш қилишимиз зарурлиги, айниқса, боғ ва токзорлар орасига ишлов берадиган махсус техникаларни сотиб олишга эътибор қаратиш, мавжуд техника паркани ҳар йили камида 10 фоизга янгилаб бориш лозимлигини қайд этиш жоиз.

Маълумки, 2011 йилда Асак тумани тўлиқ мева-сабзавот етиштиришга ихтисослаштирилди. Бунинг натижасида аввало туманда етиштирилдиган мева-сабзавот маҳсулотлари ҳажмини 45-50 фоизга ошириш, бозорларда нарх-навонинг барқарор бўлишига, деҳқончиликда даромад анча кўпайишига эришилди.

Янги имкониятларни инобатга олган ҳолда, Республика озиқ-овқат корхоналари уюшмаси томонидан келгуси уч йилда вилоятда мева-сабзавотни қайта ишлайдиган 27 та, гўшт ва сут маҳсулотларини қайта ишлайдиган 48 та, шунингдек, бошқа қишлоқ хўжалиги маҳсулотларини қайта ишлайдиган 140 та корхона янгитдан ташкил қилиниши мўлжалланмоқда.

Қадрли юртдошлар!

Андижон халқининг изланувчанлиги, янгиликка интилиб яшаши, ташаббускорлиги — ана шундай фазилатлари кичик бизнес ва хусусий тадбиркорлик соҳасини ривожлантиришда ўз ифодасини топмоқда.

Бугунги кунда Андижон вилоятида мазкур йўналишда фаолият кўрсатаётган корхоналар сони 22 минг 200 тани ташкил этаётгани ва айни шу соҳада аҳолининг 80 фоиздан ортиғи банд бўлганининг ўзи кўп нарсадан далолат беради.

Агарки Андижон халқининг 80 фоизи тадбиркорлик ҳисобидан яшаётган бўлса, қани, айтинглар, бу соҳага одамларни жалб этиш учун яна қандай даъват бўлиши мумкин? Эришилган мана шундай маррани маҳкам ушлашимиз керак. Такрор айтман, кичик бизнес ва тадбиркорлик йўлида мавжуд бўлган ҳар қандай сунъий тўсиқни олиб ташлаш лозим. Ҳуқуқ-тартибот идоралари ходимлари, вазирлар ва ҳокимлар буни чуқур тушуниб олиши шарт.

Узингиз ўйланг, тадбиркор ўз кучи, ўз сармосия ҳисобидан ўз ишини ташкил қилади ва шу орқали даромад топади. Бизнинг ишимизга халақит бермасангиз, ўз оиламизни ҳам, эл-юртни ҳам боқиб ҳисса кўшамиз, деб меҳнат қилади. Бундай одамларни фақат қўллаб-қувватлаш, фақат ёрдам бериш керак.

Тадбиркорлик азал-азалдан халқимизнинг қонида бор. Энг зўр хунармандлар, савдогарлар, усталар бизнинг юртимизда бўлган. Буюк бобомиз Амир Темур ўз даврида бу борада шундай тартиб ўрнатган эдики, унинг «Тузуқлар» асарида ёзилишича, агар салтанатнинг у чеккасида бу чеккасига ёш бола бир лаган тиллони бошига кўйиб борадиган бўлса, унга ҳеч ким дахл қилмас экан.

Бу билан улуг аждодимиз, ўзи ишламасдан, бошқаларнинг ҳисобидан кун кўрадиган ҳар хил қароқчи ва зўравонларнинг адабини бердим, бутун мамлакатда адолат ўрнатдим, деб таъкидлаётганини тушуниш қийин эмас, деб ўйлайман.

Мен бир пайтлар эртанги кунимизни, келажакни ўйлаб, фермерлик ҳаракатига ўтганимизда, фермерларга қарата, ҳеч нарсадан қўрқмасдан, олдинга босаверинглар, ортингизда Президент турибди, деб айтган эдим. Бугун эса барча тадбиркорларга қарата айтмоқчиман: дадил қадам босаверинглар, ортингизда Президент турибди.

Вилоятдаги кичик бизнес ва хусусий тадбиркорлик субъектларининг замонавий ишлаб чиқариш соҳаларига, хусусан, автомобилсозлик ва автомобилларга хизмат кўрсатиш тармоғига кенг жалб этилаётгани, умуман, замонавий сервис соҳасини ривожлантиришга катта эътибор бериллаётгани аҳолимизни иш билан таъминлашда, одамларнинг даромадини оширишда муҳим ўрин тутмоқда.

Андижон вилоятида 2007-2012 йилларда, яъни охириги олти йилда хизматлар ҳажми 2,6 баробар ортиб, мазкур соҳада қарийб 160 мингта иш ўрни яратилгани бу йўналишда кўп иш қилинаётганидан далолат беради.

Айниқса, мобиль алоқа тармоғини кенгайтириш, 160 километрдан зиёд оптик толали алоқа линиясини барпо этиш, 44 та «Интернет-кафе» ташкил қилиш, автомат телефон станцияларини юз фоиз рақамли тизимга ўтказиш бўйича амалга оширилган инвестиция дастурлари мобиль алоқа абонентлари сонини 4,6 баробар, интернетдан фойдаланувчилар сонини 7,8 баробар ошириш имконини берди. Бунинг натижасида алоқа ва ахборот хизматлари ҳажми 3,7 баробар ўсди.

Ана шундай ўзгаришлар туфайли ялпи ҳудудий маҳсулот таркибида жами хизматларнинг улуши ортиб, 2006 йилдаги 31,5 фоиздан 2012 йилда 45,5 фоизга етганини албатта ижобий баҳолаш лозим. Ҳурматли депутатлар!

Андижон вилоятида қишлоқ жойларда намунавий лойиҳалар асосида уй-жойлар қуриш дастурининг ижроси алоҳида эътиборга лойиқ.

Мен 2011 йилнинг кузида Андижон туманининг Ўрикзор массивида барпо этилган ана шундай янги ҳовли-жойларнинг эгалари билан учрашганимда, уларнинг юз-кўзидаги хурсандчиликни кўриб, бу иморатлар ҳақиқатан ҳам халқимиз орзу қилган, унинг кўнглидаги уйлар эканига яна бир бор ишонч ҳосил қилган эдим.

Ўтган тўрт йил мобайнида Андижон вилоятида 89 та мавзеда 2 минг 115 та намунавий уй-жой барпо этилиб, кўплаб оилалар шаҳар шароитидан асло кам бўлмаган қулай уйларга кўчиб кирди. Ана шу массивларда қарийб 100 километрлик сув тармоғи, 61 километр электр тармоғи, 76 километр

табiiй газ тармоғи, 56 километр ички йўллар ва бошқа инфратузилма объектлари барпо этилганини таъкидлаш лозим.

Сизларга маълумки, шу йил 16-17 апрель кунлари Тошкент шаҳрида катта бир халқаро конференция бўлиб ўтди. Ушбу анжуманда Ўзбекистонда қишлоқ аҳолиси учун замонавий уй-жойлар қуриш тажрибаси ва эришилган натижаларни ўрганиш учун дунёнинг 60 дан ортиқ мамлакатидан, шунингдек, Бирлашган Миллатлар Ташкилоти, Халқаро валюта жамғармаси, Жаҳон банки, Осиё тараққиёт банки, Ислон тараққиёт банки, АСЕАН, ЮНЕСКО каби нуфузли халқаро ташкилотлар, молия институтларидан вакиллар, уй-жой қурилиши соҳасидаги йирик компаниялар раҳбарлари ва етакчи мутахассислар, жами 300 дан зиёд чет эллик меҳмон иштирок этди.

Анжуман қатнашчилари юртимизнинг бир қанча вилоят ва туманларида бўлиб, қишлоқ аҳли учун бунёд этилган уйлар билан яқиндан танишдилар, одамларимиз билан суҳбатлашиб, уларнинг ҳаётга қараши, маданий савияси, эртанги кунга ишончи ортиб бораётганига юксак баҳо бердилар. Ўзбекистоннинг қандай буюк салоҳиятга эга бўлаётганига, эркин ва фаровон ҳаёт қуришдек эзгу мақсад йўлидан қатъият билан бораётганига, энг муҳими, биз 22 йил олдин танлаган тараққиёт йўлимиз тўғри эканига иқдор бўлдилар.

Азиз дўстлар!

Андижон вилоятида бошқа муҳим ижтимоий дастурларни ҳаётга жорий қилиш бўйича ҳам салмоқли натижаларга эришилмоқда. Бу ҳақда гапирганда, кейинги йилларда аҳолини марказлаштирилган тармоқлар орқали ичимлик суви билан таъминлаш 89,7 фоизни, табиий газ билан таъминлаш эса 75,3 фоизни ташкил этганини қайд этиш лозим.

Бу борадаги ишларимизни давом эттирган ҳолда, келгуси уч йилда ичимлик ва оқава сув тизимини комплекс ривожлантириш ва модернизация қилиш дастури асосида вилоятда 150 километр магистраль сув тармоғи барпо этилади, 183 километрлик тармоқ эса реконструкция қилинади. Бу ишларни амалга ошириш учун давлат бюджетидан 45 миллиард сўмдан зиёд маблағ ажратиш кўзда тутилган. Натижада вилоятдаги 230 дан ортиқ қишлоқда ичимлик суви таъминотини янада яхшилаб, бу борадаги кўрсаткични 92,3 фоизга етказиш мўлжалланмоқда.

Аҳолига транспорт хизмати кўрсатиш масаласини оладиган бўлсак, вилоят бўйича 2006-2012 йилларда 490 тадан ортиқ янги автобус сотиб олинганини айтиш лозим.

Яқин келгусида вилоятга яна 400 та автобус олиб келиш ва шу асосда қишлоқ жойларда, айниқса узоқ ва чекка ҳудудларда яшайдиган аҳолига транспорт хизмати кўрсатишни яхшилаш режалаштирилмоқда.

Халқимизнинг турмуш даражаси ва сифатини оширишга

қаратилган бундай ишлар ҳақида гапирганда, сизларнинг эътиборингизни яна бир муҳим стратегик лойиҳага қаратмоқчиман. Ушбу йирик лойиҳага биноан, қиймати 1 миллиард доллар, қуввати 900 мегавольт бўлган Тўрақўрғон иссиқлик электр станцияси барпо этилади.

Бу улкан иншоотнинг ишга туширилиши Фарғона, Наманган, Андижон вилоятларининг электр энергиясига бўлган бугунги эҳтиёжини тўлиқ таъминлаш имконини берибгина қолмасдан, бу ҳудудларнинг истиқболдаги ривожига қандай катта ўрин тутишини, ўйлайманки, ҳаммамиз яхши тушунаимиз.

Биз учун сувдек, ҳаводек зарур бўлган яна бир муҳим тармоқ — транспорт-коммуникация соҳасини ривожлантириш бўйича ҳам катта ишлар амалга оширилмоқда. Бу борада Қамчиқ довони орқали ўтадиган автомобиль йўлини кенгайтириш ва реконструкция қилиш учун кейинги 5 йилда қарийб 630 миллиард сўм, жумладан, йўл техникаси харид қилишга 8 миллиард сўм йўналтирилганини таъкидлаш лозим. Бу эса Фарғона водийси, жумладан, Андижон вилоятига ва бу ердан мамлакатимизнинг бошқа минтақаларига юк ва йўловчи ташиш ҳажми ва сифатини янада ошириш имконини бермоқда.

Шу борада биз кўпдан буён ўйлаб юрган, бугунги кунга келиб рўёбга чиқариш имкони пайдо бўлган яна бир муҳим режамиз ҳақида сизларга ахборот бермоқчиман. У ҳам бўлса, Ангрен-Поп йўналишида умумий узунлиги қарийб 125 километр бўлган электрлаштирилган темир йўл қуриш лойиҳасини амалга оширмоқчимиз.

Маълумки, Фарғона водийси мамлакатимизнинг темир йўл тармоқларига уланиш нуқтаи назаридан Ўзбекистоннинг бошқа ҳудудларидан ажралиб қолган. Ҳозирги кунда темир йўл орқали водийга бориш учун қаердан ўтишга тўғри келишини сизлар яхши биласиз. Бугунги кунда Фарғона водийсида 10 миллиондан ортиқ аҳоли яшайди. «Олтин водий» деб ном олган бу минтақани Ўзбекистоннинг бошқа ҳудудлари билан темир йўл орқали боғлаш масаласини эътибордан четда қолдиришга бизнинг ҳаққимиз йўқ.

Таъкидлаш керакки, айнан шу лойиҳанинг жорий этилиши Фарғона водийси вилоятларини мамлакатимиз темир йўллари тизими билан ишончли асосда бевосита боғлаш имконини яратади. Шу тариқа биз бутун Ўзбекистоннинг ҳудуд ва минтақаларини қамраб оладиган ягона миллий темир йўл тармоғини барпо этишга эришамиз. Ҳеч шубҳасиз, бу нафақат иқтисодий-ижтимоий, керак бўлса, сиёсий аҳамиятга молик стратегик лойиҳадир.

Бир пайтлар Ўзбекистоннинг электр, табиий газ тармоқлари, автомобиль йўллари бошқа давлатларнинг ҳудуди орқали ўтарди. Кейинги ўн йил ичида биз бу борада жуда катта ишларни амалга оши-

риш ҳисобидан ушбу коммуникацияларнинг барчасини ўз мамлакатимиз ҳудудидан ўтказишга эришдик. 2014-2015 йилларда темир йўл масаласида ҳам бу ишни албатта охирига етказамиз. Насиб этса, 2016 йилда мана шу темир йўл қуриб битказилиши билан водийга, жумладан, Андижонга поездга билан бемалол қатнаш имконига эга бўламиз.

Қадрли юртдошлар!

Ижтимоий соҳадаги ўзгаришлар ҳақида сўз юритганда, аввало ёш авлодимизнинг соғлом ва баркамол бўлиб вояга етишида бекиёс ўрин тутадиган таълим тизимида амалга оширилаётган катта ишлар ҳақида гапиришимиз табиийдир.

Вилоятда 2006-2012 йилларда 53 та лицей ва коллеж, 159 та умумтаълим мактаби, 17 та мусиқа ва санъат мактаби қурилгани ва реконструкция қилингани бу борадаги дастурларимиз изчиллик билан бажарилаётганидан далолат беради. Жорий йилда яна 6 та мактаб, 3 та касб-хунар коллежи ва академик лицей, 2 та олий ўқув юрти реконструкция қилинади, 12 та мактаб ва 6 та касб-хунар коллежи капитал таъмирланади, Андижон тиббиёт институтининг ахборот-ресурс маркази барпо этилади.

Соғлиқни сақлаш соҳасидаги ислохотлар ҳам вилоятда ўзининг ижобий самарасини бермоқда. Бунинг тасдиғини шу ўтган даврда ҳар сменада 3 минг нафардан ортиқ кишига хизмат кўрсатадиган поликлиника муассасалари, 930 ўринга эга бўлган шифо масканлари фойдаланишга топширилгани мисолида кўриш мумкин.

2013 йилда яна 9 та тиббиёт муассасасини, жумладан, вилоят онкология диспансери, болалар кўп тармоқли тиббиёт маркази ва болалар санаторийсини реконструкция қилиш режалаштирилган. Бу мақсадлар учун 54 миллиард 900 миллион сўм маблағ сарфлаш кўзда тутилмоқда.

Аҳоли саломатлигини мустаҳкамлашнинг муҳим омили бўлган спорт соҳасида ҳам юқори натижалар қўлга киритилмоқда. Айниқса, вилоят ёшларининг мамлакатимиз ва жаҳон миқёсидаги мусобақаларда юқори ўринларни эгаллаб келаётгани барчамизга ғурур-ифтихор бағишлайди.

Ҳақиқатан ҳам, 2006-2012 йилларда нуфузли халқаро мусобақаларда Андижон ёшлари орасидан 107 нафар ўқувчи, жумладан, 57 нафар қиз бола иштирок этиб, уларнинг 72 нафари совринли ўринларни қўлга киритгани албатта ҳаммамизни хурсанд қилади.

Ҳозирги кунда энг долзарб аҳамиятга эга бўлган аҳолини иш билан таъминлаш масаласига эътибор қаратадиган бўлсак, вилоятда 2006-2012 йилларда, яъни охириги етти йилда ярим миллионга яқин иш ўрни яратилгани ва бунинг қарийб 70 фоизи қишлоқ жойларда ташкил этилганини катта ютуғимиз сифатида қабул қилишимиз керак.

(Давоми 4-бетда)



# ПРЕЗИДЕНТ ИСЛОМ КАРИМОВНИНГ ХАЛҚ ДЕПУТАТЛАРИ АНДИЖОН ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИДАГИ НУТҚИ

(Давоми,  
боши 1-, 2-, 3-бетларда)

Айни вақтда бу борада ҳали кўп иш қилишимиз зарурлигини, ўйлайманки, барчамиз тўғри тушунамиз. Хусусан, жорий йилда тасдиқланган дастурга кўра, вилоят бўйича қарийб 80 мингта янги иш ўрни ташкил этиш назарда тутилмоқда. Бу борада барча даражадаги раҳбарлар учун 53 минг 200 нафар касб-ҳунар коллежлари ва академик лицейлар битирувчиларини ишга жойлаштириш кун тартибидagi энг асосий вазифа бўлиб турганини алоҳида ўқитиб ўтмоқчиман.

Бу вазифани бир ёқадан бош чиқариб албатта бажариш барча-барчамизнинг энг олижаноб бурчимиздир.

Сўнги 6 йил давомида вилоятда аҳоли даромадлари сезиларли даражада ўсиб, аввало шунинг ҳисобидан халқимизнинг ҳаёт даражаси ва сифати ошиб бораётганини биз юқори баҳолаймиз.

Халқимиз даромадларининг асосий қисми, яъни 54 фоизга яқини тадбиркорлик ҳисобидан изчил ошиб бораётганини алоҳида таъкидлаш зарур.

Бу шахсан мен учун жуда катта аҳамиятга эга бўлган кўрсаткич. Бу рақам авваломбор Андижон аҳлининг ўз меҳнати, ўз тадбиркорлик фаолияти, ўз бизнеси ҳисобидан ўзини ва оиласини боқайтиришнинг яққол далили, тақрор айтман, бизнинг энг катта ютуғимиздир.

Аҳолимизнинг фаровонлиги ошиб бораётганини вилоятда хонадонларнинг телевизор, холодильник, мебель билан таъминланиш кўрсаткичлари мамлакатимиздаги ўртача кўрсаткичдан юқори экани, автомобилларга эга бўлган хонадонлар сони сўнги 6 йилда ҳар 100 та оилага нисбатан олганда, 19 тадан 30 тага етгани ҳам исботлайди.

Эсингизда бўлса, совет даврида одамлар машина олиш учун ўн йиллаб навбатда турар эди. МЕНГА қолса, ҳар юзта оилага юзта автомобиль тўғри келсаям, ёмон бўлмас эди.

Ҳаётимизнинг маъно-мазмунини ўзгартириб бораётган бундай ютуқлар ҳақида гап кетганда, мен биринчи навбатда аёлларга муносиб турмуш шароити яратиш бериш тўғрисида гапиришдан ҳеч чарчамайман. Шахсан мен ҳар юзта хонадонда юзта кир ювиш машинани бўлишини истардим.

Шу ўринда эркакларга муржаат қилиб айтмоқчиман: аёлларга кўпроқ ҳурмат кўрсатиш, уларга кўпроқ эътибор бериш, оғирини енгил қилиш биз, эркак зотининг энг асосий вазифаси, бурчи бўлиши лозим. Нега деганда, аёл бахтли бўлса, оила бахтли, оила бахтли бўлса, бутун жамият бахтлидир.

Андижон вилоятида кейинги йилларда амалга оширилган ўзгаришлар, қўлга киритилган ютуқлар ҳақида гапирганда, кенг кўламли қурилиш ва ободонлаштириш ишлари ҳақида алоҳида сўз юритиш ўринли-

дир. Бу ишларнинг ёрқин намунасини вилоятнинг барча шаҳар ва қишлоқларида, айниқса, Андижон шаҳри мисолида яққол кўриш, кузатиш мумкин.

Ҳозирги вақтда юртимизнинг турли ҳудудларидан бу ерга кўплаб мутахассислар, меъмор ва муҳандислар келиб, сизларнинг тажрибангизни ўрганаётгани кўпчиликка яхши маълум.

Ана шу ишларни изчил давом эттириш мақсадида 2011-2015 йилларда Андижон вилоятининг шаҳар ва туманларида яққол тартибда уй-жой массивларини қуриш, коммунал инфратузилма тармоқларини жадал ривожлантиришни кўзда тутадиган дастур қабул қилинган эди. Фурсатдан фойдаланиб, ана шу дастурнинг дастлабки натижалари ҳақида қисқача тўхталиб ўтмоқчиман.

Икки йил давомида вилоятда 372 километрлик ичимлик суви, 2 километрлик каналлаштириш, 211 километрлик табиий газ тармоғи тортилди ва реконструкция қилинди. 195 километрлик электр тармоғи янгиланди, 121 та трансформатор ўрнатилди, 46 километрлик кўчаларда чироқлар янгиланиб, 2 минг 650 та хонадонга телефон ўрнатилди.

Асака туманидаги Шинам, Карвонсарой, Умид, Имом Бухорий кўчалари таъмирланиб, электр, табиий газ ва ичимлик суви таъминоти тармоқлари янгиланди. Хўжаобод, Олтинкўл туманлари марказий кўчаларини намунавий кўчаларга айлантириш мақсадида йўл бўйида замонавий уй-жойлар қурилди, кўчаларни ёритиш тизими ва электр тармоқлари янгиланиб, табиий газ қувурларининг ер остидан ўтказилиши натижасида ушбу масканларнинг қиёфаси таниб бўлмас даражада ўзгариб кетди.

Ҳозирги вақтда Пахтаобод, Жалақудуқ, Қўрғонтепа, Андижон туманларининг марказий кўчаларида ана шундай ишлар ниҳоясига етказилмоқда ва бундай ижобий тажрибалар бошқа ҳудудларда ҳам қўлланилмоқда.

Амалга оширилган ана шундай кенг кўламли қурилиш-ободонлаштириш ишлари туфайли 250 мингдан зиёд аҳолининг электр таъминоти, 80 мингга яқин аҳолининг табиий газ таъминоти яхшиланиши, 35 километрдан ортиқ магистраль ва 380 километрлик ички автомобиль йўллари таъмирлангани «Обод турмуш йили» деб ном олган жорий йилда биз белгилаб олган мақсад ва вазифаларга ҳамоҳанглиги билан айниқса эътиборлидир.

Ҳеч иккиланмасдан айтиш керак: Андижон вилоятининг маркази, шаҳар ва турар-жойларнинг кўринишини бутунлай ўзгартириш, гўзал ва ўзига хос майдонлар, кўча ва уйларга барчанинг ҳавасини тортадиган янги қиёфа бериш, обод ва бетакрор ўлкага айлантириш — бундай олижаноб ва улкан ишларга қўл урган барча-барча Андижон аҳлига ҳар қанча тасаннолар айтсак, арзийди, албатта.

Кўп йиллар, балки юз йиллар ўтар, лекин сиз, азизларнинг амалга оширган ишларингиз абадий сақланиб қолур.

**Бир нақл бор — катта, улкан ишларни узоқдан кўриш мумкин. Шу маънода, бундай олижаноб ишларнинг аҳамияти узоқдан қараганда, баҳо берганда айниқса яққол аён бўлади.**

Нима учун бундай ишлар абадий сақланиб қолади? Чунки бу ишлар замиридаги фидоийлик, ўз юртига меҳр ва садоқат туйғуси ҳеч қачон завоқ билмайди. Андижон аҳли бундай ишлари билан, таъбир жоиз бўлса, ўзига ҳайкал қўйди. Бу — баланспарвоз гап эмас, айни ҳақиқат ва бу билан гурурлансак арзийди. Ҳаётда гурур-ифтихор билан, шукроналик билан яшайдиган одамнинг умри узоқ бўлади.

Менинг тилагим, истагим шуки, мана шундай обод шаҳар ва қишлоқлар, кўп-кўп соҳаларда эришаётган ютуқлар Андижон аҳлига буюрсин!

**Ҳурматли сессия қатнашчилари!**

Энди кун тартибига киритилган тақдир масалани муҳокама қилишга ўтсак.

Бугунги мажлисимизнинг асосий мақсади Андижон вилоятининг ҳоқими вазифасида ишлаб келган Аҳмад Усмоновнинг Тошкент вилояти ҳоқими этиб сайлангани муносабати билан Андижон вилояти ҳоқими лавозимига янги номзодни сайлаб-тасдиқлаб олишдан иборат.

Сизларга яхши маълумки, Ўзбекистонимизнинг барча ҳудуд ва минтақаларини мутаносиб ва изчил ривожлантириш устувор вазифамиздир. Бу ҳақда гапирганда, улкан салоҳиятга эга бўлган, мамлакатимизда етакчи ўрин тутадиган Тошкент вилоятини бутақариш, унинг кўптармоқли иқтисодий-тиб барқарор суръатлар билан ривожлантириш, аҳолининг ҳаёт даражасини юксалтириш — бундай вазифаларни удалаш ғоят оғир ва масъулиятли иш эканини яна бир бор таъкидлаш ўринлидир.

Тошкент вилоятида кейинги пайтда ўткир муаммоларнинг ечими топилмасдан, кўпгина масалаларда оқсоқликка йўл қўйилгани, биринчи раҳбарда ташкилотчилик, етакчилик қобилиятлари етишмагани сабабли уни ишдан озод қилишга тўғри келди.

Мана шу масъулиятли лавозимга, яъни Тошкент вилоятини бутақаришга Андижон вилоятида етти йил давомида ҳоқим бўлиб ишлаган, эл-юртга бош-қош бўлиб, вилоят эришган ютуқ ва марраларга муносиб ҳисса қўшган Аҳмад Усмонов номзоди маъқул деб топилди.

Айни пайтда Аҳмад Усмоновга билдирилган ишонч сиз, Андижон элига билдирилган ишонч ва ҳурмат белгиси, ифодаси, десам, сиз, азизлар мени тушунасанлар, деб ўйлайман.

Андижон аҳли ўз юртига бўлган меҳри ва садоқатини, гурур ва ифтихорини, ор-номусини юксак қадрлаб, ўз кучи

ва қудратига ишониб яшайдиган халқ.

Бундай олижаноб фазилатларга эга эл-юртни бутақариш, унинг эришган марралари, ўсиш суръатларини пасайтирмасдан, аҳолининг бошини қовуштириб, янги мақсад ва уфқларга сафарбар эта оладиган янги раҳбар сайлаш бугунги мажлисимиз кун тартибига қўйилган.

Кенг ва юқори салоҳиятга эга бўлган, ҳам инсонийлик, ҳам ташкилотчилик, ҳам талабчанлик нуқтаи назаридан эл-юртнинг дарду ташвиши билан яшайдиган, одамларнинг ҳаракатига ҳаракат, интилишига интилиш, ишончига ишонч қўшиб, юртни янада обод, халқнинг ҳаёт даражаси ва сифатини оширишга қурби етадиган раҳбарни топиш — ўзингиз тушунасан — бу оғир вазифа.

Шуни айтмоқчиманки, кўп жойларда янги раҳбарни лавозимга тавсия этар эканмиз, одамлар аввало Президент билдирган таклифга ишонч билан қарайди. Мен бу ишонччи юксак қадрлайман ва айни вақтда унинг замиридаги катта масъулиятни ҳам чуқур ҳис қиламан.

Бугун Андижон вилоятида 2 миллион 700 мингдан ортиқ аҳоли яшайди. Ана шундай улкан вилоят аҳлининг ҳаётига, ҳудудни иқтисодий-ижтимоий ривожлантириш, унинг муаммоларини ҳал қилишга доимо жиддий қарашимиз керак. Бир пайтлар шунга етарли эътибор бермаганимиз биз учун катта сабоқ бўлди. Мен кимнидир айбламоқчи эмасман, лекин бундай масалаларга, тақрор айтман, бепарво бўлишга ҳаққимиз йўқ. Бинобарин, вилоятга янги раҳбар танлашда кўп ва узоқ ўйлашга, жамоатчилик билан кенгашишга тўғри келди. Баъзан ўз жойида туппа-тузук ишлаб турган раҳбар янги жойида ўзини кўрсатолмаслиги, оқибатда ўзига ҳам, умумий ишга ҳам зарар етказиши мумкин. Шунинг учун бу масалада етти ўлчаб, бир кеш ш керак.

Шуларнинг барчасини инобатга олиб, Андижон вилояти фаоллари ва депутатлари, оқсоқоллар билан кўп маслаҳатлашдик, очикчасига гаплашиб олдик. Билдирилган фикр ва мулоҳазалардан келиб чиққан ҳолда, ҳозирги вақтда Андижон вилояти ҳоқими вазифасини вақтинча бажарувчи лавозимда ишлаб келаётган Шухратбек Абдураҳмонов номзодини Андижон вилояти ҳоқими вазифасига тавсия этишга қарор қилдик.

Бу номзоднинг таржимаи ҳоли ҳақида гапирадиган бўлсак, у 1969 йилда туғилган. Андижон пахтачилик институти 1992 йилда агроном мутахассислиги бўйича битирган. Кўп йиллар Пахтаобод тумани ҳоқими, вилоят ҳоқимининг муовини лавозимларида ишлаб, етарли тажриба орттирган. Энг муҳими, у Андижон вилоятининг шароити, вилоят аҳлининг табиати, орзу-интилишлари, ташвиш ва муаммоларини яхши билади, шу тупроқнинг тузини ичиб улғайган.

Одамнинг кимлигини билмоқчи бўлсанг, унга амал бериб кўр, деган гап беҳиз айтилмаган. Ҳақиқатан ҳам, эл-юрт ҳар қандай раҳбарни у амалга ўтирган пайтдан бошлаб синайди ва унга баҳо беради.

Айтиш керакки, Ш.Абдураҳмонов оддий бригада бошлиғи лавозимидан шу даражага кўтарилган. Пахтаобод туманида кўп йиллар хизмат қилган. Зарур пайтда, масалан, ана шу туманда фермерликни жорий этишда ўзини принципиал жиҳатдан кўрсатган.

Биз бугун юртимизда янги давлат, янги жамият қурмоқдамиз. Шу нуқтаи назардан қараганда, вилоятнинг янги раҳбарни эришилган марраларни янада мустақамлаб, ўсиш суръатларини тезлаштиришга интилиши лозим. Янги раҳбарнинг келиши билан эл-юрт қандайдир ўзгаришлар бўлади, деб кутади. Агарки ҳеч қандай ўзгариш сезилмаса, одамларнинг раҳбарга бўлган ишончи йўқолади.

Бу ўринда раҳбарнинг фақат ваъда бериши эмас, аввало Андижон аҳлига, вилоятнинг депутат ва фаолларига, кенг жамоатчиликка таяниб, ишни қандай ташкил этиш, қандай режа ва дастурларни амалга ошириш борасидаги фикрлари муҳимдир.

Вилоят ҳоқими аввало унга ишонч билдирган халқ олдида, унинг вакиллари бўлмиш депутатлар олдида ўз вақтида ҳисоб бериб туриши керак.

**Кадрли ва муҳтарам юртодошлар!**

Бугун сиз, азизлар билан бирга кейинги даврда амалга оширган ишларимизга якун ясаб, эришган ютуқларимизга баҳо бердик, йўл қўйилган камчилик ва муаммолар, олдимизда турган вазифалар ҳақида ҳам фикр алмашиб олдик. Энг асосийси, бугун Андижон вилоятида ҳукм сураётган тинчлик-осойишталик, бағрикенглик ва аҳиллик муҳитини кўз қорачиғидек асраш, мустақамлаш бўйича сиз, азиз депутат ва фаолларнинг фикрларини тингладик, эртанги кунимизнинг режаларини аниқлаб олдик.

Шу ўринда юрагимда, қалбимда бўлган бир фикрни айтишни истардим: мен учун доимо яқин ва қадрдон бўлган Андижон аҳли эришган барча ютуқларни мен ҳамиша гўёки ўзимнинг ютуқларим, деб қабул қиламан ва бу билан фахрланаман.

Ишончим комил, ҳамиша замон билан ҳамнафас бўлиб, ўзининг мустақам иродаси, яратувчилик салоҳияти, она юртига улкан меҳри ва садоқатини намоен этиб келаётган Андижон халқи янги раҳбар атрофида бирлашиб, у билан бамаслаҳат иш олиб бориб, Ватанимиз равнақи йўлида барча куч ва имкониятларини сафарбар этади.

Азиз дўстлар, яна бир бор сизларга ўзимнинг самимий ҳурматимни изҳор этиб, барчангизга сихат-саломатлик, хонадонларингизга тинчлик-хотиржамлик, файзу барака тилайман.



# ХАЛҚ ДЕПУТАТЛАРИ АНДИЖОН ВИЛОЯТИ КЕНГАШИНИНГ НАВБАТДАН ТАШҚАРИ СЕССИЯСИ

**Шу йил 26 апрель куни Халқ депутатлари Андижон вилояти кенгашининг навбатдан ташқари сессияси бўлиб ўтди.**

Сессияда Ўзбекистон Республикаси Президенти Ислон Каримов нутқ сўзлади.

Давлатимиз раҳбари Ўзбекистон дунёда кўпчиликнинг ҳавасини келтираётган ютуқ ва марраларга эриштиши йўлида бутун мамлакатимиз қатори Андижон вилояти меҳнатқашлари ҳам муносиб ҳисса қўшаётганини, кўп соҳаларда Андижон етакчи ўринларни эгаллаб келаётганини алоҳида таъкидлади. Вилоят маркази, барча шаҳар ва қишлоқлар қиёфаси тубдан ўзгариб, обод бўлиб, аҳолининг ҳаёт сифати ва даражаси юксалиб бораётгани барчага ғурур ва ифтихор бағишламоқда.

Кейинги етти йил мобайнида вилоятнинг ялпи ҳудудий маҳсулоти 2 баробар, саноат 2,9 баробар, қишлоқ хўжалиги 1,6 баробар, пуллик хизматлар 2,7 баробар, қурилиш ишлари 3,4 баробар ошди. Саноат соҳасини модернизация ва диверсификация қилиш ҳамда технологик янгилаш, мавжуд маҳаллий хомашёдан тайёр маҳсулотлар ишлаб чиқариш ҳажмини ошириш борасида кенг қўламли ишлар амалга оширилди. Халқаро бозорда ра-

қобатбардош, қўшимча қийматга эга бўлган маҳсулотлар ишлаб чиқарадиган замонавий корхоналар барпо этиш масаласига жиддий эътибор қаратилаётгани ўзининг салмоқли натижаларини бераётир.

Бу борада иқтисодиётимизнинг локомотиви бўлган йирик корхоналар, биринчи навбатда, Асака шаҳридаги автомобиль заводи фаолияти ҳақида ҳар қанча гапирсак арзийди, деди Юртбошимиз. Ушбу корхона мамлакатимиз учун бутунлай янги соҳа — автомобилсозлик саноатини шакллантиришда пойдевор бўлиб, юксак ва илғор технологияларни ўзлаштиришда катта роль ўйнамоқда. Хусусан, 2008 йилдан бошлаб жаҳон автомобиль саноатида етакчи ҳисобланган General Motors компанияси билан ҳамкорликда ушбу заводда машҳур Chevrolet бренди билан автомобиллар ишлаб чиқариш йўлга қўйилгани саноатимиз ривожига янги тарихий босқич бўлди.

Бугунги кунда мамлакатимизда автомобиллар учун бутловчи қисмлар ишлаб чиқарувчи корхоналар тармоғи кенгайиб бормоқда. Андижон вилоя-

тида бундай корхоналар сўнгги етти йилда 47 тадан 108 тага, улар томонидан тайёрланган маҳсулотлар ҳажми 1 триллион 100 миллиард сўмга етди.

Мазкур тармоқнинг мамлакатимиз иқтисодиётидаги ўрни ва аҳамиятини инобатга олган ҳолда соҳани юксак малакали кадрлар билан таъминлаш масаласига алоҳида эътибор қаратилмоқда. Мисол учун Асака туманида ушбу йўналишга ихтисослаштирилган касб-хўнаар коллежи, Андижон муҳандислик-иқтисодиёт институти негизда Андижон машинасозлик институти, Тошкент шаҳрида Турин политехника университети ташкил этилгани соҳани замон талаблари асосида изчил ривожлантиришда муҳим аҳамият касб этмоқда.

Юртбошимиз Андижон вилоятида сўнгги йилларда қайта ишлаш саноатини тараққий эттириш борасида ҳам салмоқли ютуқларга эришилганини таъкидлади. Агар 2006 йилда Андижонда етиштирилган пахта толасини вилоятнинг ўзида қайта ишлаш ҳажми 31,5 фоизни ташкил қилган бўлса, 2012 йилда бу рақам 40 фоизга етди. Шунингдек, тўқимачилик, трикотаж маҳсулотлари, пойабзал, чарм-галантерея буюмлари ишлаб чиқариш ҳажми-

ни кўпайтиришда сезиларли ютуқларга эришилди.

Давлатимиз раҳбари нутқида кичик бизнес ва хусусий тадбиркорликни ривожлантириш, хорижий инвестицияларни жалб этиш ва қўшма корхоналарни кўпайтириш, қурилиш материаллари, фармацевтика маҳсулотлари, маиший техника буюмлари ишлаб чиқаришга ихтисослашган корхоналарни ташкил этиш борасидаги лойиҳалар ижроси, қишлоқ хўжалигидаги кенг қўламли ислохотлар, ҳаётга замонавий ахборот-коммуникация технологияларини жорий этиш, қишлоқ жойларида намунавий лойиҳалар асосида уй-жойлар барпо этиш, ҳудудлар инфратузилмасини ривожлантириш ва ижтимоий объектлар барпо этиш сингари кенг қўламли масалалар бўйича вилоятда амалга оширилган ишлар ва бу борадаги вазифалар атрофлича таҳлил қилинди.

Президентимиз Андижон вилоятида турли соҳаларда эришилган ютуқларни қайд этган ҳолда, ишга солинмаган имкониятларни таъкидлаб, галдаги устувор вазифаларга алоҳида тўхталди.

Сессияда ташкилий масала кўрилди.

Ўзбекистон Республикаси Президенти Ислон Каримов тавсиясига кўра Андижон вило-

яти ҳоқими вазифасини вақтинча бажарувчи лавозимида ишлаб келаётган Шўхратбек Абдурахмонов Андижон вилояти ҳоқими этиб сайланди.

Сессияда «Нуроний» жамғармаси Андижон вилоят бўлими раиси Таваккал Топволдиев, GM Uzbekistan қўшма корхонаси бошқарма бошлиғи Абдуваққос Рафиқов, Хўжаобод туманидаги Шаҳрихонсой шаҳарча фуқаролар йиғини диний маърифат ва маънавий-ахлоқий тарбия масалалари бўйича амалдаги Тожибархон Йўлдошева, вилоят фермерлар кенгаши раиси Рашидбек Мамадалиев сўзга чиқиб, Президентимиз нутқида Андижон вилоятини ижтимоий-иқтисодий ривожлантиришнинг энг муҳим устувор йўналишлари ҳар томонлама чуқур таҳлил этилиб, келгусидаги долзарб вазифалар аниқ белгилаб берилганини, вилоят аҳли билдирилган фикрлардан зарур хулосалар чиқариб, ислохотлар самарасини юксалтириш, барча соҳа ва тармоқлар бўйича қабул қилинган дастурларни изчил амалга ошириш учун астойдил меҳнат қилади, деб таъкидлади.

**Олим Тўрақулов,**  
**Фахриддин Убайдуллаев**  
**ЎЗА махсус мухбирлари**

«Bunyodkor — 2013»

«Камолот» ёшлар ижтимоий ҳаракати Самарқанд вилояти кенгаши томонидан бунёдкорлик ишларига ёшларни янада кўпроқ жалб этишга қаратилган тадбирлар амалга оширилмоқда.

## Тенгдошларимиз ҳаракатда

Вилоятнинг барча шаҳар ва туманларида «Бунёдкор» ёшлар меҳнат ҳаракатига қўшилиш истагини билдирган ёшлардан аризалар қабул қилинапти.

— Талабалар ва ўрта махсус, касб-хўнаар таълими муассасалари ўқувчиларини, шунингдек, кенг ёшлар оммасини ижтимоий ҳимоялаш, уларнинг ёзги таътилдаги бўш вақтлари унумли меҳнатта сарфланишини таъминлаш мақсадида вилоятдаги барча олий ва ўрта махсус, касб-хўнаар таълими муассасалари ва маҳалла ёшларидан иборат «Бунёдкор» талаба-ёшлар ҳамда маҳалла ёшлари меҳнат ҳаракати бугунги кунга қадар юзлаб ёшларни бирлаштира олди, — дейди «Камолот» ЁИХ вилоят кенгаши бўлим мудири Абдулла Аслонов. — Жорий йилнинг февраль ва март ойлари давомида ёшлар ўртасида «Бунёдкор» ёшлар меҳнат ҳаракати тўғрисида тарғибот ишлари олиб борилди. Бугунги кунга қадар вилоят миқёсида 39 та меҳнат объектнинг рўйхати шакллантирилиб, мазкур объектлар бўйича 540 та мавсумий бўш иш ўрни аниқланди. Олий ва ўрта махсус, касб-хўнаар таълими муассасаларида таълим олаётган ёшларни «Бунёдкор» ёшлар меҳнат ҳаракатига жалб қилиш ишлари давом этмоқда.

Бугунги кунга қадар вилоят бўйича 750 нафарга яқин ёшлар меҳнат ҳаракатига аъзо бўлиш мақсадида ариза топширди. Уюшмаган ёшлардан иборат 47 та меҳнат гуруҳи тuzилиб, уларнинг 500 нафарга яқини тиббий кўрикдан ўтказилиб, меҳнат гуруҳларига бўлинди ва бириктирилган жойларга ишга юборилди.

— «Бунёдкор» меҳнат гуруҳларининг ташкил этилгани ёшлар учун ҳам моддий, ҳам маънавий қувват бўлади, — дейди «Камолот» ёшлар ижтимоий ҳаракати Нуробод тумани кенгаши бош мутахассиси Зафар Мардонов. — Нуробод туманида «Бунёдкор» ёшлар меҳнат ҳаракатига ҳозирча юз нафардан ортиқ ёшлар ариза топширди. Бугунги кунга қадар улардан етмиш нафари тиббий кўрикдан ўтказилиб, «Шўробод», «Бинокор», «Улус», «Саҳоба», «Тим», «Нурбулоқ» ҳамда «Фаллакор» гуруҳларига бўлинди. Ушбу меҳнат гуруҳлари тумандаги туртта умумтаълим мактаби, Нуробод иқтисодиёт ва сервис касб-хўнаар коллежи ўқувчилари тураржойи ҳамда намунали уй-жойлар қурилишида меҳнат қилмоқда.

Ёшларнинг меҳнатдан кейинги вақтларини мазмунли ўтказиш мақсадида Ҳаракат томонидан мустақил-лигимизнинг 22 йиллиги муносабати билан турли маънавий-маърифий тадбирлар, давра суҳбатлари, акциялар ўтказиш ҳам белгиланган.

**Жасур РАҲМОНОВ,**  
**«Turkiston» мухбири**

Xushxabar

## Ёшларга намуна

«Камолот» ЁИХ тизимида кўп йиллардан буён меҳнат қилиб келаётган Нуриддин Маматов ёшларга намуна бўлишга арзийдиган инсонлардан. У ҳақиқий «Камолот»чи. Бутун умр ёшлар билан бирга. Узоқ вақт Ҳаракатнинг Марказий Кенгашида турли вазифаларда ишлади. Айни пайтда у «Камолот» ёшлар оромгоҳининг директори.

Нуриддин ака ёшлигида ҳам жуда серғайрат бўлган. Айниқса, унинг афғон урушида қатнашгани алоҳида хурматга лойиқдир. Шу боис бўлса керак, «Камолот» ёшлар ижтимоий ҳаракати сафига қўшилганидан бошлаб ёшларни ватанпарварлик ва тинчликсеварлик руҳида тарбиялашга ўзининг муносиб ҳиссасини қўшиб келяпти. Бундай саъй-ҳаракатлари давлатимиз томонидан юксак баҳола-ниб, 2011 йилда Нуриддин Маматов «Шўхрат» меда-

ли билан тақдирланди. Яқинда эса, унга яна бир мукофот — Ўзбекистон жангчи фахрийлар бирлашмасининг кўкрак нишони топширилди.

Шу муносабат билан «Камолот» ЁИХ Марказий Кенгашига Ўзбекистон жангчи фахрийлар бирлашмасининг раҳбарияти ва бир гуруҳ аъзолари йиғилиши. Мазкур ташкилот мамлакатимизда йигирма йилдан буён фаолият юритмоқда. Унга жами 60 минг нафарга яқин байнал-милалчи жангчи фахрий-

лар — афғон уруши ҳамда бошқа локал урушларда қатнашган юртдошларимиз бирлашган.

— Мана, неча йилдирки, биз республикадаги энг йирик ёшлар ташкилоти — «Камолот» ёшлар ижтимоий ҳаракати билан яқиндан ҳамкорлик қиляпмиз, — дейди Ўзбекистон жангчи фахрийлар бирлашмасининг раиси Талъат Муродов. — Жангчи фахрийларимиз Ҳаракатнинг ёшларни ватанпарварлик руҳида тарбиялашга қаратилган лойиҳалари, масалан, спортсоғломлаштириш оромгоҳлари, қолаверса, турли учрашув ва давра суҳбатларида иштирок этишади. Шунингдек, бирлашманинг ташаббуси билан республикаимиздаги умумтаълим мактабларида «Турон-патриот»

ҳарбий-спорт гуруҳлари ташкил этилаётганини ҳам алоҳида таъкидлаш-ни хоҳлардим. Ҳозир бундай гуруҳлар Қарши, Бухоро, Термиз шаҳарларидаги мактаб ҳамда пойтахтимиздаги 21- ва 22-меҳрибонлик уйларида очилган. Бугун сафдош дўстимиз Нуриддин Маматовга бирлашмамизнинг кўкрак нишонини топширдик. «Камолот» ЁИХда у каби фидойи, мард ва жасур инсонлар борлиги барчамиз учун фажр.

Учрашувда Ўзбекистон жангчи фахрийлар бирлашмасининг бошқа аъзоларига ҳам сўз берилди. Меҳмонлар Ҳаракатнинг Марказий Кенгаши раҳбариятига ҳамкорликни кучайтиришга доир таклифларини билдиришди.

**Наргиза БАҲОДИРОВА,**  
**«Turkiston» мухбири**

Fan oylilari

## Информатикага оид 7 кун

Пойтахтимиздаги Яккасарой енгил саноат касб-хўнаар коллежидан аниқ фанлар ойлиги доирасида «Информатика ҳафталиги» ўтказилмоқда. Ҳафталик ўқувчиларнинг замонавий ахборот технологияларига доир билимларини такомиллаштиришга қаратилган.

Коллежда ўқувчиларга информатика ва ахборот технологияси фани ўқитилади. Ҳафталикнинг илк кунда ана шу фандан ўқувчилар томонидан бажарилган мустақил ишлар кўргаз-

маси ташкил этилди. Кўргазмада намайиш этилган ижодий-интеллектуал ишлар, масалан, компьютер макети ҳамда турли мавзулардаги веб-сайтлар кўпчиликда қизиқиш уйғотди.

Ҳафталик доирасида информатика ва ахборот технологияси фанидан махсус семинар ҳам бўлиб ўтди. Бунда ўқувчилар информатика ва веб-технологиялар соҳасидаги янгиликлар, интернет сайтларини яратиш ва бошқа мавзуларда тайёрлаган слайд-маърузаларини тақдим этишди. Айтиш керакки, бундай тақдиротлар бўйича ўқувчилар ўртасида алоҳида кўрик-танлов ҳам ташкил этилган. Ҳафта давомида коллеж ўқитувчилари слайдларни баҳолаб боришади.

Катта танаффусда гуруҳлар «Лото» ўйинида қатнашишлари мумкин. Ҳафта шартига кўра, ўқувчи «Лото» кутисидан информатикага оид биттадан савол олиб, унга имкон қадар қисқа вақт ичида тўлиқ жавоб бериши керак.

«Информатика ҳафталиги» дастуридан бошқа кўплаб қизиқарли лойиҳалар ҳам ўрин олган. Жумладан, яқин кунларда барча курс ўқувчилари ўртасида мавзуга доир деворий газеталар танлови ҳамда «Заковат» интеллектуал беллашувини ўтказиш кўзда тутилган.

**Зарофат УМАРБЕКОВА,**  
**Яккасарой енгил саноат касб-хўнаар коллежи ўқитувчиси**



# Ёшлар учун ZOR имконият

«Ўзбекистон маданияти ва санъати форуми» жамғармаси ҳамда «Билайн» уяли алоқа компанияси кўмагида амалга оширилаётган «Zo'r-zo'r Star» мусиқий телевизион танлови ноанъанавийлиги ва жозибдорлиги билан ёшларда катта қизиқиш уйғотди ва йилнинг энг ёрқин лойиҳаларидан бирига айланди. Айни кунларда мусиқий телевизион танловнинг иккинчи босқичи бўлиб ўтмоқда.

Лойиҳанинг дастлабки босқичида бир неча минг даъвогарлар орасидан ўн бир нафар истеъдодли иштирокчи танлаб олинди. Улар хореография, вокал, санъаткорлик маҳорати, психология ва бошқа фанлардан машғулларда қатнашиб, сўнг ҳисобот концертини бошлашди. «Zo'r-zo'r Star» ҳисобот концерт дастурлари фақат жонли ижрода бўлиб ўтмоқда.

Ҳар бир «Zo'r-zo'r Star» ҳисобот концертидаги иштирокчи

дан ташқари, ўзбек эстрадасининг таъриқли вакиллари, маданият ва санъат намояндалари таклиф этиляпти. Айнан улар ҳар бир иштирокчининг воқалдаги, умуман, санъатдаги маҳоратига баҳо беришади.

Танловни телевизор ва интернет орқали кузатиб бораётган томошабинлар ҳам ўзларига ёққан иштирокчига sms тарзида овоз бермоқда. Томошабинлар ҳар шанба кuni телеэкран орқали намойиш этилаётган «Zo'r-zo'r Star» ҳисобот концерти орқали қайси иштирокчи ўз маҳоратини тўлақонли очиб бера олгани, ким қандай кўшиқ куйлагани, ҳакамлар кимга қандай баҳо бергани, мухлислар sms-овоз бериш орқали кимни кўллаб-қувватлагани ҳамда ким лойиҳани тарқатганини билиб олишмоқда.

Иштирокчиларнинг ҳар бир чиқиши ўзига хос. Эътиборлиси, номернинг композицион тузилиши устида нафақат профессионаллар, балки иштирокчиларнинг ўзлари ҳам ишлашяпти.

— «Zo'r-zo'r Star» лойиҳаси орқа-



ли янги-янги истеъдод соҳиблари кашф этиляпти, — дейди Ўзбекистон халқ артисти Насиба Абдуллаева. — Лойиҳанинг асосий мақсади ҳам янги овоз эгаларини аниқлаш ва уларнинг келгуси ижодий фаолиятини кўллаб-қувватлашдан иборат. Иштирокчилар ҳисобот концерт дастурларида эстрада юлдузлари билан яхшигина дуэт ҳам куйлашяпти. Бундан мамнунман, албатта. Бундан буён ҳам уларни кузатиб бораман!

Дарвоқе, танлов ғолиблари 7 июнь кuni «Истиқлол» санъат саройида бўлиб ўтадиган ҳисобот гала-концертида эълон қилинади.

Иштирокчилардан айнан ким Zo'r-zo'r Star бўлишини эса «Билайн» уяли алоқа компанияси абонентларининг ўзи ҳал қилади. Агар сиз иштирокчиларнинг тақдирига бефарқ бўлмасангиз, унда овоз беринг!

**Рустам ЮСУПОВ,**  
«Turkiston» муҳбири

Лойиҳа мақсади: янги истеъдодларни кашф этиш ва уларни кўллаб-қувватлаш, ёш ижрочиларнинг шахсий ижодий қобилиятларини ривожлантириш, мусиқа маданияти ва санъатини оммалаштириш, ёшларнинг маънавий, интеллектуал ва маданий салоҳиятини ўстиришга кўмаклашиш.

Танловда 18 ёшдан 25 ёшгача бўлган, продюссерлик маркази билан шартномага эга бўлмаган, радио ва телевидение орқали чиқиш қилмаган Ўзбекистон фуқаролари иштирок этади.

лар чиқишлари ҳам ҳакамлар ҳайъати томонидан баҳоланмоқда. Ҳайъат таркибига педагоглар-

## Завқ ва меҳр улашган учрашув

Пойтахтимиздаги «Бунёдкор» стадионида «Ҳаёт учун!» хайрия футбол учрашуви бўлиб ўтди

Муҳташам стадионга футбол шоусида бевосита қатнашиш орқали «Ҳаёт учун!» хайрия форум-марафони иштирокчиларини кўллаб-қувватлашни мақсад қилган минглаб спортсевар мухлислар жам бўлди.

Президентимиз Ислам Каримов раҳнамолигида аҳоли саломатлигини мустаҳкамлаш, оналик ва болаликни муҳофаза қилиш, ижтимоий ҳимояга муҳтож инсонларга манзилли ёрдам кўрсатиш масалаларига алоҳида эътибор қаратилмоқда. «Обод турмуш йили» Давлат дастури доирасида бу борадаги ишлар кўлами янада кенгаймоқда.

Ушбу эзгу саъй-ҳаракатларда нодавлат ташкилотлар ҳам фаол иштирок этмоқда. Хусусан, «Ўзбекистон маданияти ва санъати форуми» жамғармаси, «Ҳаёт учун!» кўкрак беши саратони миллий уюшмаси, «Аёллар кенгаши» жамоат бирлашмаси, «Келажак овози» ёшлар ташаббуслари маркази томонидан ташкил этилаётган «Ҳаёт учун!» хайрия форум-марафони жамиятда соғлом турмуш тарзини қарор топтириш, ёшларни оммавий спортга жалб этиш, саратон хасталигига қарши курашишга хизмат қилаётир.

Тадбирда «Ўзбекистон маданияти ва санъати форуми»



жамғармаси васийлик кенгаши раиси Г.Каримова 2010 йилдан буён ўтказиб келинаётган ушбу анъанавий ижтимоий акция аҳоли, айниқса, ёшлар ўртасида катта қизиқиш уйғотганини таъкидлади. Бу йилги «Ҳаёт учун!» хайрия форум-марафони ва хайрия футбол ўйинининг минтақавий босқичлари 27 мартдан 18 апрелга қадар Қорақалпоғистон Республикаси ва барча вилоятда бўлиб ўтди. «Келажак овози» ёшлар ташаббуслари марказининг «Биз — бир жамоа, биз — бир оила!» акцияси билан бир-

галикда ўтказилган тадбирларда аҳолининг барча қатлами вакиллари, жами 220 мингдан зиёд киши иштирок этди.

Хотин-қизларни асраб-авайлаш, уларга меҳр-эътибор кўрсатиш халқимизга хос эзгу фазилатлардандир. Зеро, соғлом фарзанд туғилиши, уларнинг баркамол бўлиб вояга етиши, оилалар мустаҳкамлиги ва турмуш ободлиги кўп жиҳатдан аёл зотининг саломатлигига боғлиқ.

«Ҳаёт учун!» хайрия лойиҳаси ана шундай муҳим ижтимоий мақсадга хизмат қилмоқда.

Лойиҳа тадбирларида тўпланган маблағлар аёлларда учрайдиган саратон касаллигига қарши курашиш йўлида сарфланмоқда. Ўтган йиллар давомида кўкрак беши саратонини барвақт аниқлаш мақсадида Ўзбекистон, Жанубий Корея, АҚШ, Исроил каби мамлакатларнинг онкогинеколог, маммолог, психолог, УЗИ мутахассислари томонидан юртимиз бўйлаб 27 минг аёл бепул тиббий текширувлардан ўтказилди, хасталик аломатлари аниқланган қарийб 400 нафар аёл зарур тиббий воситалар билан

таъминланди. Айрим беморлар хориждаги клиникаларда даволанди.

Саратон касаллигини эрта аниқлаш имкониятларини янада кенгайтириш учун мамлакатимиздаги онкология диспансерларини замонавий тиббиёт жиҳозлари билан таъминлаш, шифокорлар учун хорижлик экспертлар иштирокида малака ошириш машғулотларини ташкил этиш, дунёдаги етакчи тиббиёт клиникалари билан таъриба алмашишга алоҳида эътибор қаратилмоқда.

«Ҳаёт учун!» хайрия форум-марафони АҚШнинг Сьюзен Комен номидаги саратон касаллигига қарши курашиш халқаро фонди билан ҳамкорликда ўтказилаётгани ҳам мазкур лойиҳанинг халқаро микёсдаги эътирофидан далолатдир.

... Майдонга театр ва кино ижодкорлари, санъаткорлар, спортчилар ҳамда «Келажак овози» ёшлар ташаббуслари маркази аъзоларидан иборат жамоалар кириб келади. Шоу тарзида ўтган футбол учрашуви стадионга келган минглаб мухлисларга байрамона кайфият улашди.

**Зоҳир ТОШХҲАЕВ,**  
ЎЗА муҳбири





# Узоқ манзилларни кўзлаб...

Ховос транспорт касб-хунар коллежи темир йўл транспорти ва халқ хўжалигининг бошқа тармоқларига малакали кичик мутахассисларни тайёрлашда ўзига хос тажрибага эга. Ҳозирда йигирмата йўналиш бўйича 1003 нафар ўқувчи тахсил олаётган бўлса, уларга 46 нафар юқори малакали ўқитувчи ҳамда ишлаб чиқариш таълими устаси сабоқ бераётир.

Коллежда давлат бюджети ҳамда инвестициялар ҳисобидан физика, кимё ва биология фанлари лаборатория хоналари, информатика, рус тили ва инглиз тили ўқув хоналари, чилангарлик, пайвандлаш, автомобилларга техник хизмат кўрсатиш, темир йўлларда ҳаракатни бошқаришни ўрганиш устахоналари тўлиқ замонавий жиҳозланган.

Корея Республикаси кредити асосида жиҳозланган мультимедиа хонаси негизида коллежнинг тест маркази ташкил этилган.


Тест марказининг асосий вазифаси ўқувчиларнинг ўз устида мустақил ишлаб, билим, кўникма ва малакаларини оширишдан иборатдир. Бунда ўқувчи ўқитувчига оралик ва якуний назорат ишларини топширмайди, бу иш коллежнинг тест марказида амалга оширилади. Бу ус-

лубнинг афзаллиги шундаки, ўқувчилар билимини баҳолашга янада объектив ёндашилади.

Коллежда тест маркази иш олиб бораётганлиги, биринчидан, ўқувчилар билимининг сифат даражасини оширса, иккинчидан, битирувчи мутахассис олий ўқув юртига кириб ўқиш учун тайёр ҳолатда бўлади. Ушбу метод вилоятдаги бошқа касб-хунар коллежлари томонидан қизғин маъқулланди ва бу кенг оммалаштирилмоқда.

Ўқув хоналаридаги мавжуд компьютерларда электрон кутубхона яратиш жараёни давом этмоқда. Эндиликда ўқувчилар интернет орқали коллеж ахборот-ресурс маркази сайтига кириб, ўзларига керакли маълумотни олиш имконига эга бўладилар.

Ўқувчилар билимининг самарадорлигини оширишда ишлаб чиқариш ва



ўқув амалиётларининг яхши олиб борилаётганлиги муҳим омил бўлмоқда. Бу борада темир йўл транспорти корхоналарида ўқув-амалиёт хоналари ташкил этилган. Ишлаб чиқариш ва ўқув амалиётлари бевосита коллеждаги устахоналарда ҳамда темир йўл транспорти корхоналарида амалга ошириляпти.

2011-2012 ўқув йилида амалиёт учун зарур бўладиган хомашёларга олти миллион икки юз минг сўм маблағ ажратилган бўлса, бу йил ушбу мақсадлар учун ўн миллион сўм маб-

лағ ажратилди. Албатта, ушбу хомашё материалларидан ўқув амалиётида мақсадли фойдаланишга ҳаракат қилинмоқда.

Яқинда мазкур коллежда вилоят касб-хунар коллежлари ишлаб чиқариш таълими усталари ва катта усталарининг вилоят семинари бўлиб ўтди. Унда иштирокчилар коллеждаги чилангарлик ва пайвандлаш устахоналарида бўлиб, ўзаро тажриба алмашдилар.

**Ашуралӣ БОЙМУРОДОВ,**  
«Turkiston» мухбири



## Бобо номига НОЛОЙИҚ

Ҳиндистонлик Феруз Хон ижтимоий тармоқ орқали ўз набирасини 45 минг рупий (830 АҚШ доллари)га сотиб юборди.

Лудхияна шаҳри суди 47 ёшли бу кишига етти йиллик озодликдан маҳрум қилиш жазосини тайинлади. Маълумотларга қараганда, Феруз Хоннинг қизи Нури Хон болали бўлганидан сўнг чақалоқнинг бобоси ўз набирасини сотишга ҳаракат қилади. Бунда эса унга ижтимоий тармоқлар қўл келди. Фарзанд қидириб юрган ёш ота-оналардан бирини топиш бемехр бобога қийин бўлмади. Гарчи Ҳиндистон ҳукумати томонидан ошкор этилмаётган бўлсада, шифокорлар ҳам терговда бўлган. Сабаби, онани алдаб, боласини олишлари учун бевосита шифокорлар ҳамда ҳамширалар ёрдами зарур. Хуқуқни муҳофаза қилувчи органлар томонидан тарқатилган хабарга кўра, Хон бундан олдин ҳам бир неча бор болалар савдоси билан шуғулланиб келган. Сўнгги икки йил мобайнида Ҳиндистонда 800 га яқин болалар савдоси билан шуғулланувчи тўдалар аниқланган.

## Бу сафар ЎХШАМАДИ

Жанубий Кореянинг йирик телерадиокомпанияси — «KBS» хонанда «PSY»нинг янги — «Жентельмен» номли қўшиғига ишланган клипни эфирга чиқаришни хоҳламади.

«KBS» бадий кенгашининг фикрича, клип ёш аудиторияга ёмон намуна бўлади. «Жентельмен» клипи баҳорнинг ўрталарида «YouTube»да эълон қилинган эди. Ўтган кунлар ичида уни кўрганлар сони 140 миллиондан ошиб кетди. Клипда реппер «Машиналарни қўйиш мумкин эмас» деган ёзувни отиб юборади ва уни ўраб турган одамларни мазах қилади. Реппер «Жентельмен» клипидаги рақс ҳаракатлари учун ушбу рақсни бир неча йил аввал ўйлаб толган «Жанубий Корея» гуруҳига пул тўлаган. Бу билан «PSY» муаллифлик ҳуқуқларини ҳурмат қилишини кўрсатган.

## Яна ҳам қулай

«Facebook» ижтимоий тармоғи кириллча логотипни тестдан ўтказишни бошлади.

Айни дамда ушбу логотип «Facebook» фойдаланувчиларидан беш фоизига кўринмоқда. Мазкур ижтимоий тармоқнинг расмий хабарларига кўра, бу, асосан, МДХ давлатлари учун мўлжалланган. Компания вакиллари логотип билан боғлиқ тестлар «Facebook»нинг бошқа тилдаги вариантларида ҳам ўтказилган бўлиши мумкинлигини инкор этмади. Ҳозирги кунда «Facebook» фойдаланувчилари ўз хоҳишларига кўра интерфейс тилини танлашлари мумкин. Жаҳоннинг энг йирик ижтимоий тармоғидан жами бир миллиард киши фойдаланади. 2012 йилнинг апрель ойида «Facebook» фотосуратлар билан ишлашга мўлжалланган ижтимоий тармоқ — «Instagram»ни сотиб олган эди. 2012 йилнинг декабрида эса, «Instagram» 25 тилдаги, жумладан, рус тилидаги интерфейсни тақдим этди.

**Интернет манбалари асосида**  
**Жавоҳир КАРОМАТОВ тайёрлади**

### Yoshlik ilhomi

#### ЮРТИМ

*Ҳар манзил, ҳар гўшанг — обод ва кўркам,  
Чаман боғларинга тўймайди кўзим.  
Жаҳонда қай юртдан айтгин, ниманг кам?  
Юртим, чиройингдан айланай ўзим.*

*Мен шодон кезаман, қадим кентларинг,  
Аждодлар руҳи шод, кезар бунда жим.  
Самога бўйлаган обидаларинг,  
Юртим, чиройингдан айланай ўзим.*

*Тўрт фасл тарк этмас сени тароват,  
Кумуш қиш, баҳору ёз ва кўзларинг.  
Бир номинг — меҳрдир, бири — саховат,  
Юртим, чиройингдан айланай ўзим.*

*Қуёшдек ягона, азиз, ҳур диёр,  
Порлоқ толеингдек ёруғдир юзим.  
Бағринда не буюк зотлар хоки бор,  
Юртим, чиройингдан айланай ўзим.*

*Бемехр қалбларга асранди эмас,  
Ҳаётда бор ўрним, ўз айтар сўзим.  
Кошки, хизматингга ярай олсам, бас,  
Юртим, жамолингдан айланай ўзим.*

#### БЕБАҲО БОЙЛИК

*Таъбиш тушса бошинга,  
Пешонангдан кўрарсан.  
Ота-онанг бор бўлса,  
Кўксинг тоғдек юрарсан.*

*Сув келганда симириб,  
Тоғ келганда кемириб,  
Сув ичсанг ҳам семириб,  
Кўксинг тоғдек юрарсан.*

*Ҳар кунинг байрамга тенг,  
Андух билмас юрагинг.  
Келаберар яшагинг,  
Кўксинг тоғдек юрарсан.*

*Изламайсан дур-табҳар,  
Ота-онанг — бойлик, зар.  
Қадрин билсанг, шу етар,  
Кўксинг тоғдек юрарсан.*

**Шахло ИСМОИЛОВА,**  
**Сурхондарё вилояти Қизилқум**  
**туманидаги 74-мактаб ўқувчиси**

### Menga so'z bering

## Қадриятдек қадрли

Мураббий касби тақозосиданми, ёшларни доимо кузатиб боради. Улардан фазилат излайди. Ҳаёт сўқмоқларидан одимлаб, унинг турфа ранглирини кўриб, маъноларини англаб боришида ёрдам бергиси келади. Меҳрини, кўз нурини, бор куч, билимини аямай, кўнгилларга зиё бахш этади. Ўқувчисидан бирор нуқсон кўрса, уни тузатишга интилади. Бутунги ёшларимизнинг ҳавас қилгулик жиҳатлари кўп, уларнинг қизиқиш доираси кенг. Илғор техника тилини тез тушунади, тил ўрганиш қобилияти кучли. Хуқуқ, солиқ, молия, санъат каби соҳаларни тез ўзлаштира олади.

Ўзим фаолият юритаётган даргоҳдаги ўқувчиларнинг иқтидорларини кўриб, фахрланаман, завқланаман, эришаётган ютуқларидан хурсанд бўламан. Мен раҳбарлик қилаётган «Ёш адабиётшунос» тўғараги аъзоларидан Нозима Хўжамқулова, Маъмур Раҳматов, Юнус Садридинов «Машъал учқунлари» тўғарагига ҳам аъзо бўлиб, турли йўналишдаги мақола ва шеърлари билан кўпчиликка манзур бўляпти. «Ораста қизлар» тўғарагида ҳам бир қанча қувонарли ишлар қилинапти.

Афсуски, айрим ёшларимизнинг қадриятларимиздан узоқлашиб бораётганини кўриб хавотирга тушаман. Дарс хоналарида, аудиторияларда бир-бирига хунук сўзларни ишлатадиган ёшларни кўриб, хижолат бўламан. Сўзлашиш маданиятининг бузилиши, она тилига бўлган ҳурматсизлик ёшлар билан бирга кейинги авлодга ўтмаслигига ким кафолат беради?

Бундай муомала маданиятининг бузилиши бир кунда пайдо бўлгани йўқ. Бу — ота-оналарнинг, биз, ўқитувчиларнинг

этиборсизлик, лоқайдлигимиз оқибати.

Расул Ҳамзатовнинг «Доғистон» асарига узоқ йиллар чет элда яшаган фарзандининг дарагини эшитган она ўғлининг қайси тилда гапирганини сўрайди. У билан учрашган йигит унинг она тилини унутиб, хорж тилида гапирганини айтганида, у менинг ўғлим эмас, менинг ўғлим ўз она тилини унутмайди, деб жавоб беради. Уни ўқиб, анча таъсирланган эдим. Шундай экан, ёшларимизнинг тилимиз гўзаллигини сақлаб қолишларига биз ҳам масъул эмасми? Тилимиз гўзаллигини ўзимиз амалда кўрсатиб берсак, буюк шоирларимизнинг шеърларини ёд олдирик, мағзини чақишига ёрдамлашсак, уларнинг сўз бойликлари ортади, талаффузлари чиройли бўлади. Она тилида сўзлашиш қадриятдек қадрли эканлигини теранроқ англаб етадилар.

**Феруза УМИРҚУЛОВА,**  
**Бўка агросаноат ва транспорт**  
**касб-хунар коллежи**  
**ўқитувчиси,**  
**Касб-хунар таълими аълочиси**



Tasviriy san'at

Ўзбекистон Бадий академияси ва «Ўзбекистон маданияти ва санъати форуми» жамғармаси ҳамкорлигида бу йил ўнинчи марта ташкил этилган «Тасвирий санъат фестивали» ҳафталиги кеча якунига етди.

Нафосат, гўзаллик, маънавият ва санъат байрамига айланган ушбу фестиваль кунларида Ўзбекистон Бадий академиясига туташ хиёбонлар, яшил майсазорларда ижодкор ўқувчилар жонажон юртимиз шаҳару қишлоқлари, мафтункор табиати, оила, мактаб манзараларини тасвирладилар. Ёш хунармандлар шу ернинг ўзида — томошабинлар кўз ўнгида миллий хунармандлик буюмларини тайёрлади. Моҳир рассомлар, санъатшунос олимлар, уста ва хунармандлар иштирокидаги маҳорат дарслари, мулоқот ва учрашувлар ёш мусаввирлар учун катта тажриба мактаби вазифасини ўтади.



Сардор Муллажонов олган суратлар

Inson huquqlari — oliy qadriyat

## Тадбиркор қонун ҳимоясида

Тошкент вилоятининг Юқоричирчиқ туманида истиқомат қилувчи «Дилором Самандар» хусусий корхонаси раҳбари, тадбиркор А.Мажлимов ўтган йилнинг октябрь ойида ўз фаолиятини кенгайтириш мақсадида янги дўкон қурилиши учун кредит олмақчи бўлди. «Халқ банки»нинг Юқоричирчиқ туман филиалига оғзаки мурожаат қилди. Бироқ мазкур банкнинг мутасаддилари кредит таъминоти учун гаров сифатида мол-мулк етарли эмаслигини маълум қилиш билан чекланган. Ваҳоланки, кредит олишда мавжуд тартиблар, кредитларнинг бошқа турлари ёки олинган қарз миқдорини қоплашда гаров билан боғлиқ ҳолатни, ҳатто бошқа имкониятларни топишда ёрдам беришлари мумкин эди.

Тадбиркор бир неча ой ўтиб, яъни февраль ойида кредит масаласида банкнинг кредит бўлимига қайтадан мурожаат қилди. Банк томонидан тадбиркорга мўлжалланган кредитни

расмийлаштириш учун керакли хужжатлар ва гаров таъминоти тўғрисида жавоб хати берилмаган.

«Тадбиркорлик фаолияти эркинлигининг кафолатлари тўғриси-

да»ги қонунга асосан, тадбиркорнинг мурожаати, у қандай шаклда бўлмасин, қабул қилиниши, расмийлаштирилиши, унга ёзма равишда жавоб берилиши лозим эди. Банк муассасида тадбиркорлар бурчаги ташкил этилмаганлиги, тадбиркорга ҳуқуқий тушунтириш ишлари олиб борилмаганлиги натижасида тадбиркор Мажлимов юқори идораларга мурожаат қилган. Тадбиркор мурожаати қонун талаблари асосида кўриб чиқилмаганлиги оқибатида у бирор натижа чиқармаган, дея сарсон бўлиб банкка қатнаб юраверган.

Тошкент вилоят адлия бошқармаси ишонч телефонига қўнғироқ қил-

ган тадбиркорнинг мурожаати ўрганиб чиқилди. Адлия бошқармаси давлат тижорат «Халқ банки»нинг Юқоричирчиқ туман филиали бошлиғига келтирилган қонун бузилиши ҳолатларини бар тараф этиш ва келгусида бундай камчиликларга йўл қўймаслик юзасидан чоралар кўриш юзасидан тақдимнома киритди. Тадбиркорлар билан ишлашда совуққонлик қилган, уларга мавжуд тартиб ва талабларни ёзма равишда тўғри тушунтириш ишларини йўлга қўймаган ходимларга нисбатан тегишли чоралар кўрилди.

**Дилбар ХУДОЙБЕРДИЕВА,**  
«Turkiston» мухбири

Jurnalning yangi soni

## Қизиқарли, таҳлилий

«Демократлаштириш ва инсон ҳуқуқлари» илмий-маърифий журнаlining навбатдаги сони нашрдан чиқди. Обод турмуш йилига бағишланган бош мақола «Ободлик кўнгилдан бошлади» деб номланади. «Хорижий тажриба» рукни остида ҳуқуқшунос олима Наргиза Дўстмухамедованинг «Хорижий мамлакатлар бола ҳуқуқлари тўғрисидаги қонунчилигининг қиёсий-ҳуқуқий таҳлили» мақола-си ҳам журналхонлар эътиборига ҳавола этилган. «Фикрга қарши — фикр, ғояга қарши — ғоя» рукнида Мансур Мусаевнинг «Ахборот хуружи ва унинг халқаро муносабатларга таҳиди» мақола-сини ўқийсиз. Бундан ташқари, журналда «Ҳуқуқ назарияси масалалари» рукнида ёш олимлар, тадқиқотчиларнинг мақола-ларига ҳам кенг ўрин берилган.



**Дилбар ЭРКИНОВА**

Ҳаракатнинг Балиқчи тумани кенгаши томонидан «Камолот» ойлари лойиҳаси ўтказилмоқда. Лойиҳа доирасида тумандаги «Уч булоқ» дам олиш масканида «Эзгу мақсадлар сари бирлашайлик!» шиори остида ноанъанавий ёшлар фестивали ташкил этилди.

Эзгу мақсадлар сари

Фестивалда мактаблар, касб-хунар коллежлари ва маҳаллалардаги ёшлар рақс, кўшиқ, аскиячилик бўйича бор маҳоратини намойиш этишди.

Фестивалда маҳаллаларда ва таълим муассасаларида тўқувчилик, тикувчилик, кулоллик, ҳайкалтарошлик, рассомлик билан шуғулланаётган ёшларнинг ижодий кўргазмаси иштирокчиларда катта қизиқиш уйғотди.

Фестиваль сўнггида «Энг яхши кўргазма», «Энг яхши ва ёш аскиячи», «Энг яхши рақс», «Энг яхши кўшиқ ижроси учун» номинациялари ғолиблари аниқланди.

Ёшлар фестивали хонандаларнинг дилга яқин кўшиқлари ва рақслари билан давом этди.

**Дилрабо РАҲИМОВА,**  
«Камолот» ЁИХ Балиқчи тумани кенгаши етакчи мутахассиси

Bir shingil

## ҲАММАСИ БИЗ ҲАҚИМИЗДА

Инсон ҳаёти давомида ўртача 30 тонна ёки олти филнинг оғирлигига тенг егулик истеъмол қилади.

Одам миясининг 70-75 фоизи сувдан иборат. Инсон юраги бир кунда ўртача 90-100 минг марта уради.

Инсон кунига ўртача ҳисобда 15 марта кулади. Ҳеч ким кўзлари очик ҳолда аксира олмайди.

**ЎЗДЖТУ талабаси**  
**Шоҳсанам МАҲМУДОВА тайёрлади**

## YON DAFTARCHANGIZGA

Бошқаларсиз яшай оламан, дегувчилар катта хатога йўл қўядилар. Менсиз ҳеч нарса қила олишмайди, дегувчилар янада кўпроқ адашадилар.

**Франсуа де Ларошфуко**

Turkiston

### МУАССИС:

«КАМОЛОТ»  
ЁШЛАР ИЖТИМОЙ ҲАРАКАТИ  
МАРКАЗИЙ КЕНГАШИ

Газета Ўзбекистон  
Республикаси  
Матбуот ва ахборот  
агентлигида 2007  
йил 19 апрелда  
№ 0242 рақам  
билан рўйхатдан  
ўтган.



### Бош муҳаррир:

**Ашуров Салим Тўраевич**

### Тахрир ҳайъати:

Баҳодир Фаниев, Меҳриддин Шукуров (бош муҳаррир ўринбосари — «Turkiston»), Элмурод Нишоннов (масъул котиб — «Turkiston»), Ирина Кочергина (бош муҳаррир ўринбосари — «Молодежь Узбекистана»), Елена Калинина (масъул котиб — «Молодежь Узбекистана»), Рустам Қосимов

### Навбатчи муҳаррир:

Умарова  
Наргиза  
Баҳодировна

### Саҳифаловчи:

Рўзиев  
Зафар  
Хусанович

Газета тахририят компьютер марказида терилди ва саҳифаланди.

Манзилмиз: 100083, Тошкент,  
Матбуотчилар кўчаси, 32.

Телефонлар:  
(371) 233-95-97. (371) 233-79-69  
e-mail: info@turkiston.uz

«Шарқ» нашриёт-матбаа акциядорлик компанияси босмахонасида, А-3 форматда чоп этилди. Ҳажми — 2 босма табоқ.  
Корхона манзили: «Буюк Турон» кўчаси, 41.

Буюртма Г-443.  
Адади — 13965  
Босишга топшириш вақти — 21.00  
Тоширилди — 00.40  
ЎЗА якуни — 23.00

Офсет усулида босилган.

1 2 3 4 5 6